

**Ṛgveda-Saṁhitā-Maṇḍala 9**  
Transliterated Text ohne Akzente

(see notes at the end)

- 9.001.01a svādiṣṭhayā madiṣṭhayā pavasva soma dhārayā |  
9.001.01c indrāya pātave sutah ||  
9.001.02a rakṣohā viśvacarṣaṇir abhi yonim ayohatam |  
9.001.02c druṇā sadhastham āsadat ||  
9.001.03a varivodhātamo bhava maṁhiṣṭho vṛtrahantamah |  
9.001.03c paṛṣi rādho maghonām ||  
9.001.04a abhy arṣa mahānām devānām vītim andhasā |  
9.001.04c abhi vājam uta śravaḥ ||  
9.001.05a tvām acchā carāmasi tad id artham dive-dive |  
9.001.05c indo tve na āśasaḥ ||  
9.001.06a punāti te parisrutam somam sūryasya duhitā |  
9.001.06c vāreṇa śāsvatā tanā ||  
9.001.07a tam īm aṇvīḥ samarya ā gṛbhṇanti yoṣaṇo daśa |  
9.001.07c svasāraḥ pārye divi ||  
9.001.08a tam īm hinvanty agruvo dhamanti bākuraṁ dṛtim |  
9.001.08c tridhātu vāraṇam madhu ||  
9.001.09a abhīmam aghnyā uta śrīṇanti dhenavaḥ śiśum |  
9.001.09c somam indrāya pātave ||  
9.001.10a asyed indro madeṣv ā viśvā vṛtrāṇi jighnate |  
9.001.10c sūro maghā ca maṁhate ||
- 9.002.01a pavasva devavīr ati pavitraṁ soma raṁhyā |  
9.002.01c indram indo vṛṣā viśa ||  
9.002.02a ā vacyasva mahi psaro vṛṣendo dyumnavattamah |  
9.002.02c ā yonim dharnaṣiḥ sadaḥ ||  
9.002.03a adhukṣata priyam madhu dhārā sutasya vedhasaḥ |  
9.002.03c apo vasiṣṭa sukratuḥ ||  
9.002.04a mahāntam tvā mahīr anv āpo arṣanti sindhavaḥ |  
9.002.04c yad gobhir vāsaiṣyase ||  
9.002.05a samudro apsu māmṛje viṣṭambho dharuṇo divaḥ |  
9.002.05c somaḥ pavitre asmayuḥ ||  
9.002.06a acikradad vṛṣā harir mahān mitro na darśataḥ |  
9.002.06c sam sūryeṇa rocate ||  
9.002.07a giras ta inda ojasā marmṛjyante apasyuvaḥ |  
9.002.07c yābhir madāya śumbhase ||  
9.002.08a tam tvā madāya ghrṣvaya u lokakṛtnum īmahe |  
9.002.08c tava praśastayo mahīḥ ||  
9.002.09a asmabhyam indav indrayur madhvaḥ pavasva dhārayā |  
9.002.09c parjanya vṛṣṭimāṁ iva ||  
9.002.10a goṣā indo nṛṣā asy aśvasā vājasā uta |  
9.002.10c ātmā yajñasya pūrvyaḥ ||
- 9.003.01a eṣa devo amartyaḥ parṇavīr iva dīyati |  
9.003.01c abhi droṇāny āsadam ||  
9.003.02a eṣa devo vipā kṛto 'ti hvarāmsi dhāvati |  
9.003.02c pavamāno adābhyaḥ ||  
9.003.03a eṣa devo vipanyubhiḥ pavamāna ṛtāyubhiḥ |

9.003.03c harir vājāya mṛjyate ||  
9.003.04a eṣa viśvāni vāryā sūro yann iva satvabhiḥ |  
9.003.04c pavamānaḥ siṣāsati ||  
9.003.05a eṣa devo ratharyati pavamāno daśasyati |  
9.003.05c āviṣ kṛṇoti vagvanum ||  
9.003.06a eṣa viprair abhiṣṭuto 'po devo vi gāhate |  
9.003.06c dadhad ratnāni dāsuṣe ||  
9.003.07a eṣa divaṃ vi dhāvati tiro rajāmsi dhārayā |  
9.003.07c pavamānaḥ kanikradat ||  
9.003.08a eṣa divaṃ vy āsarat tiro rajāmsy aspṛtaḥ |  
9.003.08c pavamānaḥ svadhvaraḥ ||  
9.003.09a eṣa pratnena janmanā devo devebhyaḥ sutaḥ |  
9.003.09c hariḥ pavitre arṣati ||  
9.003.10a eṣa u sya puruvrato jajñāno janayann iṣaḥ |  
9.003.10c dhārayā pavate sutaḥ ||

9.004.01a sanā ca soma jeṣi ca pavamāna mahi śravaḥ |  
9.004.01c athā no vasyasas kṛdhi ||  
9.004.02a sanā jyotiḥ sanā svar viśvā ca soma saubhagā |  
9.004.02c athā no vasyasas kṛdhi ||  
9.004.03a sanā dakṣam uta kratum apa soma mṛdho jahi |  
9.004.03c athā no vasyasas kṛdhi ||  
9.004.04a pavītāraḥ punītana somam indrāya pātave |  
9.004.04c athā no vasyasas kṛdhi ||  
9.004.05a tvaṃ sūrye na ā bhaja tava kratvā tavotibhiḥ |  
9.004.05c athā no vasyasas kṛdhi ||  
9.004.06a tava kratvā tavotibhir jyok paśyema sūryam |  
9.004.06c athā no vasyasas kṛdhi ||  
9.004.07a abhy arṣa svāyudha soma dvibarhasaṃ rayim |  
9.004.07c athā no vasyasas kṛdhi ||  
9.004.08a abhy arṣānapacyuto rayim samatsu sāsaḥ |  
9.004.08c athā no vasyasas kṛdhi ||  
9.004.09a tvāṃ yajñair avīṛdhan pavamāna vidharmaṇi |  
9.004.09c athā no vasyasas kṛdhi ||  
9.004.10a rayim naś citram aśvinam indo viśvāyum ā bhara |  
9.004.10c athā no vasyasas kṛdhi ||

9.005.01a samiddho viśvatas patiḥ pavamāno vi rājati |  
9.005.01c pṛiṇan vṛṣā kanikradat ||  
9.005.02a tanūnapāt pavamānaḥ śṛṅge śiśāno arṣati |  
9.005.02c antarikṣeṇa rārajat ||  
9.005.03a īlenyaḥ pavamāno rayir vi rājati dyumān |  
9.005.03c madhor dhārābhir ojasā ||  
9.005.04a barhiḥ pṛācīnam ojasā pavamāna stṛṇan hariḥ |  
9.005.04c deveṣu deva īyate ||  
9.005.05a ud ātair jihate bṛhad dvāro devīr hiraṇyayīḥ |  
9.005.05c pavamānena suṣṭutāḥ ||  
9.005.06a suśilpe bṛhatī mahī pavamāno vṛṣaṇyati |  
9.005.06c naktośāsā na darśate ||  
9.005.07a ubhā devā nṛcakṣasā hotārā daivyā huve |  
9.005.07c pavamāna indro vṛṣā ||  
9.005.08a bhāratī pavamānasya sarasvatīlā mahī |

9.005.08c imam̄ no yajñam ā gaman tisro devīḥ supeśasaḥ ||  
9.005.09a tvaṣṭāram agrajām̄ gopām̄ puroyāvānam̄ ā huve |  
9.005.09c indur indro vṛṣā hariḥ pavamānaḥ prajāpatiḥ ||  
9.005.10a vanaspatim pavamāna madhvā sam aṅgdhi dhārayā |  
9.005.10c sahasravalśam̄ haritam bhrājamānam̄ hiraṇyayam̄ ||  
9.005.11a viśve devāḥ svāhākṛtim pavamānasyā gata |  
9.005.11c vāyur bṛhaspatiḥ sūryo 'gnir indraḥ sajośasaḥ ||

9.006.01a mandrayā soma dhārayā vṛṣā pavasva devayuh̄ |  
9.006.01c avyo vāreṣv asmayuh̄ ||  
9.006.02a abhi tyam madyam madam indav indra iti kṣara |  
9.006.02c abhi vājino arvataḥ ||  
9.006.03a abhi tyam pūrvyam madam̄ suvāno arṣa pavitra ā |  
9.006.03c abhi vājam uta śravaḥ ||  
9.006.04a anu drapsāsa indava āpo na pravatāśaran |  
9.006.04c punānā indram āśata ||  
9.006.05a yam atyam iva vājinam mrjanti yośaṇo daśa |  
9.006.05c vane krīlantam atyavim ||  
9.006.06a tam̄ gobhir vṛṣaṇam̄ rasam madāya devavītaye |  
9.006.06c sutam bharāya sam̄ sṛja ||  
9.006.07a devo devāya dhārayendrāya pavate sutah̄ |  
9.006.07c payo yad asya pīpayat ||  
9.006.08a ātmā yajñasya ram̄hyā suśvāṇaḥ pavate sutah̄ |  
9.006.08c pratnam̄ ni pāti kāvyam ||  
9.006.09a evā punāna indrayur madam madiṣṭha vītaye |  
9.006.09c guhā cid dadhiṣe giraḥ ||

9.007.01a aṣṭgram indavaḥ pathā dharmann ṛtasya suśriyah̄ |  
9.007.01c vidānā asya yojanam̄ ||  
9.007.02a pra dhārā madhvo agriyo mahīr apo vi gāhate |  
9.007.02c havir haviṣṣu vandyah̄ ||  
9.007.03a pra yujo vāco agriyo vṛṣāva cakradad vane |  
9.007.03c sadmābhi satyo adhvaraḥ ||  
9.007.04a pari yat kāvyā kavir nṛmṇā vasāno arṣati |  
9.007.04c svar vājī siśāsati ||  
9.007.05a pavamāno abhi spr̄dho viśo rājeva sīdati |  
9.007.05c yad īm ṛṇvanti vedhasaḥ ||  
9.007.06a avyo vāre pari priyo harir vaneṣu sīdati |  
9.007.06c rebho vanuṣyate matī ||  
9.007.07a sa vāyum indram aśvinā sākam madena gacchati |  
9.007.07c raṇā yo asya dharmabhiḥ ||  
9.007.08a ā mitrāvaruṇā bhagam madhvaḥ pavanta ūrmayah̄ |  
9.007.08c vidānā asya śakmabhiḥ ||  
9.007.09a asmathyam̄ rodasī rayim madhvo vājasya sātaye |  
9.007.09c śravo vasūni sam̄ jitam ||

9.008.01a ete somā abhi priyam indrasya kāmam akṣaran |  
9.008.01c vardhanto asya vīryam ||  
9.008.02a punānāśaś camūśado gacchanto vāyum aśvinā |  
9.008.02c te no dhāntu suvīryam ||  
9.008.03a indrasya soma rādhase punāno hārdi codaya |  
9.008.03c ṛtasya yonim āśadam ||

9.008.04a mṛjanti tvā daśa kṣipo hinvanti sapta dhītayah |  
9.008.04c anu viprā amādiṣuḥ ||  
9.008.05a devebhyas tvā madāya kaṁ sṛjānam ati meṣyah |  
9.008.05c saṁ gobhir vāsayāmasi ||  
9.008.06a punānaḥ kalaśeṣv ā vastrāṇy aruṣo hariḥ |  
9.008.06c pari gavyāny avyata ||  
9.008.07a maghona ā pavasva no jahi viśvā apa dviṣaḥ |  
9.008.07c indo sakhāyam ā viśa ||  
9.008.08a vṛṣṭim divaḥ pari srava dyumnam pṛthivyā adhi |  
9.008.08c saho naḥ soma pṛtsu dhāḥ ||  
9.008.09a nṛcaksasaṁ tvā vayam indrapītam svarvidam |  
9.008.09c bhakṣīmahi prajām iṣam ||

9.009.01a pari priyā divaḥ kavir vayāmsi napyor hitaḥ |  
9.009.01c suvāno yāti kavikratuḥ ||  
9.009.02a pra-pra kṣayāya panyase janāya juṣṭo adruhe |  
9.009.02c vīty arṣa caniṣṭhayā ||  
9.009.03a sa sūnur mātārā śucir jāto jāte arocayat |  
9.009.03c mahān mahī ṛtāvṛdhā ||  
9.009.04a sa sapta dhītibhir hito nadyo ajinvad adruhaḥ |  
9.009.04c yā ekam akṣi vāvṛdhuḥ ||  
9.009.05a tā abhi santam aṣṭtam mahe yuvānam ā dadhuḥ |  
9.009.05c indum indra tava vrata ||  
9.009.06a abhi vahnir amartyaḥ sapta paśyati vāvahiḥ |  
9.009.06c krivir devīr atarpayat ||  
9.009.07a avā kalpeṣu naḥ pumas tamāmsi soma yodhyā |  
9.009.07c tāni punāna jaṅghanaḥ ||  
9.009.08a nū navyase navīyase sūktāya sādhyā pathaḥ |  
9.009.08c pratnavad rocayā rucaḥ ||  
9.009.09a pavamāna mahi śravo gām aśvaṁ rāsi vīravat |  
9.009.09c sanā medhām sanā svaḥ ||

9.010.01a pra svānāso rathā ivārvanto na śravasyavaḥ |  
9.010.01c somāso rāye akramuḥ ||  
9.010.02a hinvānāso rathā iva dadhanvire gabhastyoḥ |  
9.010.02c bharāsaḥ kāriṇām iva ||  
9.010.03a rājāno na praśastibhiḥ somāso gobhir añjate |  
9.010.03c yajño na sapta dhātṛbhiḥ ||  
9.010.04a pari suvānāso indavo madāya barhaṇā girā |  
9.010.04c sutā arṣanti dhārayā ||  
9.010.05a āpānāso vivasvato jananta uṣaso bhagam |  
9.010.05c sūrā aṇvaṁ vi tanvate ||  
9.010.06a apa dvārā matīnām pratnā ṛṇvanti kāravaḥ |  
9.010.06c vṛṣṇo harasa āyavaḥ ||  
9.010.07a samīcīnāsa āsate hotāraḥ saptajāmayah |  
9.010.07c padam ekasya piprataḥ ||  
9.010.08a nābhā nābhīm na ā dade cakṣuś cit sūrye sacā |  
9.010.08c kaver apatyam ā duhe ||  
9.010.09a abhi priyā divas padam adhvaryubhir guhā hitam |  
9.010.09c sūraḥ paśyati cakṣasā ||

9.011.01a upāsmāi gāyatā naraḥ pavamānāyendave |

9.011.01c abhi devāṃ iyakṣate ||  
 9.011.02a abhi te madhunā payo 'tharvāṇo aśiśrayuḥ |  
 9.011.02c devaṃ devāya devayu ||  
 9.011.03a sa naḥ pavasva śaṃ gave śaṃ janāya śaṃ arvate |  
 9.011.03c śaṃ rājann ośadhībhyah ||  
 9.011.04a babhrave nu svatavase 'ruṇāya divispr̥se |  
 9.011.04c somāya gātham arcata ||  
 9.011.05a hastacyutebhir adribhiḥ sutam somam punītana |  
 9.011.05c madhāv ā dhāvata madhu ||  
 9.011.06a namased upa sīdata dadhned abhi śrīṇītana |  
 9.011.06c indum indre dadhātana ||  
 9.011.07a amitrahā vicarṣaṇiḥ pavasva soma śaṃ gave |  
 9.011.07c devebhyo anukāmakṛt ||  
 9.011.08a indrāya soma pātave madāya pari śicyase |  
 9.011.08c manaścin manasas patiḥ ||  
 9.011.09a pavamāna suvīryaṃ rayim soma rirīhi naḥ |  
 9.011.09c indav indreṇa no yujā ||

9.012.01a somā aśṛgram indavaḥ sutā ṛtasya sādane |  
 9.012.01c indrāya madhumattamāḥ ||  
 9.012.02a abhi viprā anūṣata gāvo vatsaṃ na mātaraḥ |  
 9.012.02c indram somasya pītaye ||  
 9.012.03a madacyut kṣeti sādane sindhor ūrmā vipaścit |  
 9.012.03c somo gaurī adhi śritaḥ ||  
 9.012.04a divo nābhā vicakṣaṇo 'vyo vāre mahīyate |  
 9.012.04c somo yaḥ sukratuḥ kaviḥ ||  
 9.012.05a yaḥ somaḥ kalaśeṣv āṃ antaḥ pavitra āhitaḥ |  
 9.012.05c tam induḥ pari śasvaje ||  
 9.012.06a pra vācam indur iṣyati samudrasyādhi viṣṭapi |  
 9.012.06c jinvan kośam madhuścutam ||  
 9.012.07a nityastotro vanaspatir dhīnām antaḥ sabardughah |  
 9.012.07c hinvāno mānuṣā yugā ||  
 9.012.08a abhi priyā divas padā somo hinvāno arṣati |  
 9.012.08c viprasya dhārayā kaviḥ ||  
 9.012.09a ā pavamāna dhāraya rayim sahasravarcasam |  
 9.012.09c asme indo svābhuvam ||

9.013.01a somaḥ punāno arṣati sahasradhāro atyaviḥ |  
 9.013.01c vāyor indrasya niṣkṛtam ||  
 9.013.02a pavamānam avasyavo vipram abhi pra gāyata |  
 9.013.02c suṣvāṇam devavītaye ||  
 9.013.03a pavante vājasātaye somāḥ sahasrapājasaḥ |  
 9.013.03c gṛṇānā devavītaye ||  
 9.013.04a uta no vājasātaye pavasva bṛhatīr iṣah |  
 9.013.04c dyumad indo suvīryam ||  
 9.013.05a te naḥ sahasriṇam rayim pavantām ā suvīryam |  
 9.013.05c suvānā devāsa indavaḥ ||  
 9.013.06a atyā hiyānā na hetṛbhir aśṛgram vājasātaye |  
 9.013.06c vi vāram avyam āśavaḥ ||  
 9.013.07a vāsrā arṣantīndavo 'bhi vatsaṃ na dhenavaḥ |  
 9.013.07c dadhanvire gabhastyoḥ ||  
 9.013.08a juṣṭa indrāya matsaraḥ pavamāna kanikradat |

9.013.08c viśvā apa dviṣo jahi ||  
 9.013.09a apaghnanto arāvṇaḥ pavamānāḥ swardṛśaḥ |  
 9.013.09c yonāv ṛtasya sīdata ||  
  
 9.014.01a pari prāsiṣyadat kaviḥ sindhor ūrmāv adhi śritaḥ |  
 9.014.01c kāram bibhrat puruspr̥ham ||  
 9.014.02a girā yadī sabandhavaḥ pañca vrātā apasyavaḥ |  
 9.014.02c pariṣkr̥ṇvanti dharmasim ||  
 9.014.03a ād asya śuṣmiṇo rase viśve devā amatsata |  
 9.014.03c yadī gobhir vasāyate ||  
 9.014.04a niriṇāno vi dhāvati jahac charyāṇi tānvā |  
 9.014.04c atrā sam̐ jighnate yujā ||  
 9.014.05a naptībhir yo vivasvataḥ śubhro na māmṛje yuvā |  
 9.014.05c gāḥ kr̥ṇvāno na nirṇijam ||  
 9.014.06a ati śritī tiraścatā gavyā jigāty aṇvyā |  
 9.014.06c vagnum iyarti yaṁ vide ||  
 9.014.07a abhi kṣipaḥ sam agmata marjayantīr iṣas patim |  
 9.014.07c pr̥sthā gr̥bhṇata vājinaḥ ||  
 9.014.08a pari divyāni marmṛśad viśvāni soma pārthivā |  
 9.014.08c vasūni yāhy asmayuḥ ||  
  
 9.015.01a eṣa dhiyā yāty aṇvyā śūro rathebhīr āsubhiḥ |  
 9.015.01c gacchann indrasya niṣkr̥tam ||  
 9.015.02a eṣa purū dhiyāyate bṛhate devatātaye |  
 9.015.02c yatrāmṛtāsa āsate ||  
 9.015.03a eṣa hito vi nīyate 'ntaḥ śubhrāvatā pathā |  
 9.015.03c yadī tuñjanti bhūrṇayaḥ ||  
 9.015.04a eṣa śr̥ṅgāṇi dodhuvac chiśīte yūthyo vṛṣā |  
 9.015.04c nṛmṇā dadhāna ojasā ||  
 9.015.05a eṣa rukmibhir īyate vājī śubhrebhir am̐subhiḥ |  
 9.015.05c patiḥ sindhūnām bhavan ||  
 9.015.06a eṣa vasūni pibdanā paruṣā yayivāṁ̐ ati |  
 9.015.06c ava śādeṣu gacchati ||  
 9.015.07a etam mṛjanti marjyam upa droṇeṣv āyavaḥ |  
 9.015.07c pracakr̥ṇam mahīr iṣaḥ ||  
 9.015.08a etam u tyam̐ daśa kṣipo mṛjanti sapta dhītayaḥ |  
 9.015.08c svāyudham madintamam ||  
  
 9.016.01a pra te sotāra oṇyo rasam madāya ghr̥ṣvaye |  
 9.016.01c sargo na takty etaśaḥ ||  
 9.016.02a kratvā dakṣasya rathyam apo vasānam andhasā |  
 9.016.02c goṣām aṇveṣu saścima ||  
 9.016.03a anaptam apsu duṣṭaram̐ somam pavitra ā sr̥ja |  
 9.016.03c punīhīndrāya pātave ||  
 9.016.04a pra punānasya cetasā somaḥ pavitre arṣati |  
 9.016.04c kratvā sadhastham āsadat ||  
 9.016.05a pra tvā namobhir indava indra somā asṛkṣata |  
 9.016.05c mahe bharāya kāriṇaḥ ||  
 9.016.06a punāno rūpe avyaye viśvā arṣann abhi śriyaḥ |  
 9.016.06c śūro na goṣu tiṣṭhati ||  
 9.016.07a divo na sānu pipyuṣī dhārā sutasya vedhasaḥ |  
 9.016.07c vṛthā pavitre arṣati ||

9.016.08a tvaṁ soma vipāścitaṁ tanā punāna āyūṣu |  
9.016.08c avyo vāraṁ vi dhāvasi ||

9.017.01a pra nimneneva sindhavo ghnanto vṛtrāṇi bhūrṇayaḥ |  
9.017.01c somā aṣṛgram āśavaḥ ||  
9.017.02a abhi suvānāsa indavo vṛṣṭayaḥ pṛthivīm iva |  
9.017.02c indraṁ somāso akṣaran ||  
9.017.03a atyūrmir matsaro madaḥ somaḥ pavitre arṣati |  
9.017.03c vighnan rakṣāṁsi devayuh ||  
9.017.04a ā kalaśeṣu dhāvati pavitre pari śicyate |  
9.017.04c ukthair yajñeṣu vardhate ||  
9.017.05a ati trī soma rocanā rohan na bhrājase divam |  
9.017.05c iṣṇan sūryaṁ na codayaḥ ||  
9.017.06a abhi viprā anūṣata mūrdhan yajñasya kāravaḥ |  
9.017.06c dadhānāś cakṣasi priyam ||  
9.017.07a tam u tvā vājinaṁ naro dhībhir viprā avasyavaḥ |  
9.017.07c mṛjanti devatātaye ||  
9.017.08a madhor dhārām anu kṣara tīvraḥ sadhastham āsadaḥ |  
9.017.08c cārur ṛtāya pītaye ||

9.018.01a pari suvāno giriṣṭhāḥ pavitre somo akṣāḥ |  
9.018.01c madeṣu sarvadhā asi ||  
9.018.02a tvaṁ vipras tvaṁ kavir madhu pra jātam andhasaḥ |  
9.018.02c madeṣu sarvadhā asi ||  
9.018.03a tava viśve sajoṣaso devāsaḥ pītim āśata |  
9.018.03c madeṣu sarvadhā asi ||  
9.018.04a ā yo viśvāni vāryā vasūni hastayor dadhe |  
9.018.04c madeṣu sarvadhā asi ||  
9.018.05a ya ime rodasī mahī sam mātareva dohate |  
9.018.05c madeṣu sarvadhā asi ||  
9.018.06a pari yo rodasī ubhe sadyo vājebhir arṣati |  
9.018.06c madeṣu sarvadhā asi ||  
9.018.07a sa śuṣmī kalaśeṣv ā punāno acikradat |  
9.018.07c madeṣu sarvadhā asi ||

9.019.01a yat soma citram ukthyaṁ divyam pārthivaṁ vasu |  
9.019.01c tan naḥ punāna ā bhara ||  
9.019.02a yuvaṁ hi sthaḥ svarpatī indraś ca soma gopatī |  
9.019.02c īśānā pipyataṁ dhiyaḥ ||  
9.019.03a vṛṣā punāna āyūṣu stanayann adhi barhiṣi |  
9.019.03c hariḥ san yonim āśadat ||  
9.019.04a avāvaśanta dhītayo vṛṣabhasyādhi retasi |  
9.019.04c sūnor vatsasya mātaraḥ ||  
9.019.05a kuvid vṛṣaṇyantībhyaḥ punāno garbham ādadhat |  
9.019.05c yāḥ śukraṁ duhate payaḥ ||  
9.019.06a upa śikṣāpatasthuṣo bhiyasam ā dhehi śatruṣu |  
9.019.06c pavamāna vidā rayim ||  
9.019.07a ni śatroḥ soma vṛṣṇyaṁ ni śuṣmaṁ ni vayas tira |  
9.019.07c dūre vā sato anti vā ||

9.020.01a pra kavir devavītaye 'vyo vārebhir arṣati |  
9.020.01c sāhvān viśvā abhi spṛdhaḥ ||

9.020.02a sa hi śmā jaritṛbhya ā vājam gomantam invati |  
9.020.02c pavamānaḥ sahasriṇam ||  
9.020.03a pari viśvāni cetasā mṛśase pavase matī |  
9.020.03c sa naḥ soma śravo vidaḥ ||  
9.020.04a abhy arṣa bṛhad yaśo maghavadbhyo dhruvaṁ rayim |  
9.020.04c iṣaṁ stotṛbhya ā bhara ||  
9.020.05a tvaṁ rājeva suvrato girah somā viveśitha |  
9.020.05c punāno vahne adbhuta ||  
9.020.06a sa vahnir apsu duṣṭaro mṛjyamāno gabhastyoḥ |  
9.020.06c somaś camūṣu sīdati ||  
9.020.07a kṛīur makho na maṁhayuḥ pavitraṁ soma gacchasi |  
9.020.07c dadhat stotre suvīryam ||

9.021.01a ete dhāvantīndavaḥ somā indrāya ghr̥ṣvayaḥ |  
9.021.01c matsarāsaḥ svarvidaḥ ||  
9.021.02a pravṛṇvanto abhiyujaḥ suṣvaye varivovidaḥ |  
9.021.02c svayaṁ stotre vayaskṛtaḥ ||  
9.021.03a vṛthā kṛīlanta indavaḥ sadhastham abhy ekam it |  
9.021.03c sindhor ūrmā vy akṣaran ||  
9.021.04a ete viśvāni vāryā pavamānāsa āśata |  
9.021.04c hitā na saptayo rathe ||  
9.021.05a āsmin piśaṅgam indavo dadhātā venam ādiśe |  
9.021.05c yo asmabhyam arāvā ||  
9.021.06a ṛbhur na rathyaṁ navam dadhātā ketam ādiśe |  
9.021.06c śukrāḥ pavadhvam arṇasā ||  
9.021.07a eta u tye avīvaśan kāṣṭhām vājino akrata |  
9.021.07c sataḥ prāsaviṣur matim ||

9.022.01a ete somāsa āśavo rathā iva pra vājinaḥ |  
9.022.01c sargāḥ sṛṣṭā aheṣata ||  
9.022.02a ete vātā ivoravaḥ parjanyaṣyeva vṛṣṭayaḥ |  
9.022.02c agner iva bhramā vṛthā ||  
9.022.03a ete pūtā vipāścitaḥ somāso dadhyāśiraḥ |  
9.022.03c vipā vy ānaśur dhiyaḥ ||  
9.022.04a ete mṛṣṭā amartyāḥ sasṛvāmso na śāśramuḥ |  
9.022.04c iyakṣantaḥ patho rajaḥ ||  
9.022.05a ete pṛṣṭhāni rodasor viprayanto vy ānaśuḥ |  
9.022.05c utedam uttamaṁ rajaḥ ||  
9.022.06a tantum tanvānam uttamam anu pravata āśata |  
9.022.06c utedam uttamāyyam ||  
9.022.07a tvaṁ soma paṇibhya ā vasu gavyāni dhārayaḥ |  
9.022.07c tataṁ tantum acikradaḥ ||

9.023.01a somā asṛgram āśavo madhor madasya dhārayā |  
9.023.01c abhi viśvāni kāvyā ||  
9.023.02a anu pratnāsa āyavaḥ padaṁ navīyo akramuḥ |  
9.023.02c ruce jananta sūryam ||  
9.023.03a ā pavamāna no bharāryo adāśuṣo gayam |  
9.023.03c kṛdhi prajāvatīr iṣaḥ ||  
9.023.04a abhi somāsa āyavaḥ pavante madyam madam |  
9.023.04c abhi kośam madhuścutam ||  
9.023.05a somo arṣati dharnasir dadhāna indriyaṁ rasam |

9.023.05c suvīro abhiśastipāḥ ||  
9.023.06a indrāya soma pavase devebhyaḥ sadhamādyah |  
9.023.06c indo vājarī siśāsasi ||  
9.023.07a asya pītvā madānām indro vṛtrāny aprati |  
9.023.07c jaghāna jaghanac ca nu ||

9.024.01a pra somāso adhanviṣuḥ pavamānāsa indavaḥ |  
9.024.01c śrīṇānā apsu mṛñjata ||  
9.024.02a abhi gāvo adhanviṣur āpo na pravatā yatīḥ |  
9.024.02c punānā indram āśata ||  
9.024.03a pra pavamāna dhanvasi somendrāya pātave |  
9.024.03c nṛbhir yato vi nīyase ||  
9.024.04a tvarī soma nṛmādanaḥ pavasva carṣaṇīsahe |  
9.024.04c sasnir yo anumādyah ||  
9.024.05a indo yad adribhiḥ sutaḥ pavitram paridhāvasi |  
9.024.05c aram indrasya dhāmne ||  
9.024.06a pavasva vṛtrahantamokthebhir anumādyah |  
9.024.06c śuciḥ pāvako adbhutaḥ ||  
9.024.07a śuciḥ pāvaka ucyate somaḥ sutasya madhvaḥ |  
9.024.07c devāvīr aghaśamsahā ||

9.025.01a pavasva dakṣasādhanō devebhyaḥ pītaye hare |  
9.025.01c marudbhyo vāyave madaḥ ||  
9.025.02a pavamāna dhiyā hito 'bhi yonim kanikradat |  
9.025.02c dharmaṇā vāyum ā viśa ||  
9.025.03a sam devaiḥ śobhate vṛṣā kavir yonāv adhi priyah |  
9.025.03c vṛtrahā devavītamaḥ ||  
9.025.04a viśvā rūpāny āviśan punāno yāti haryataḥ |  
9.025.04c yatrāmṛtāsa āsate ||  
9.025.05a aruṣo janayan girah somaḥ pavata āyuṣak |  
9.025.05c indram gacchan kavikratuḥ ||  
9.025.06a ā pavasva madintama pavitram dhārayā kave |  
9.025.06c arkasya yonim āsadam ||

9.026.01a tam amṛkṣanta vājinam upasthe aditer adhi |  
9.026.01c viprāso aṇvyā dhiyā ||  
9.026.02a tam gāvo abhy anūṣata sahasradhāram akṣitam |  
9.026.02c induḥ dhartāram ā divaḥ ||  
9.026.03a tam vedhām medhayāhyan pavamānam adhi dyavi |  
9.026.03c dharṇasim bhūridhāyasam ||  
9.026.04a tam ahyān bhurijor dhiyā samvasānam vivasvataḥ |  
9.026.04c patim vāco adābhyam ||  
9.026.05a tam sānāv adhi jāmayo hariḥ hinvanty adribhiḥ |  
9.026.05c haryatam bhūricakṣasam ||  
9.026.06a tam tvā hinvanti vedhasaḥ pavamāna girāvṛdham |  
9.026.06c indav indrāya matsaram ||

9.027.01a eṣa kavir abhiṣṭutaḥ pavitre adhi tośate |  
9.027.01c punāno ghnann apa sridhaḥ ||  
9.027.02a eṣa indrāya vāyave svarjit pari śicyate |  
9.027.02c pavitre dakṣasādhanāḥ ||  
9.027.03a eṣa nṛbhir vi nīyate divo mūrdhā vṛṣā sutaḥ |

9.027.03c somo vaneṣu viśvavit ||  
9.027.04a eṣa gavyur acikradat pavamāno hiraṇyayuh |  
9.027.04c induḥ satrājīd astrtaḥ ||  
9.027.05a eṣa sūryeṇa hāsate pavamāno adhi dyavi |  
9.027.05c pavitre matsaro madaḥ ||  
9.027.06a eṣa śuṣmy asiṣyadad antarikṣe vṛṣā hariḥ |  
9.027.06c punāna indur indram ā ||

9.028.01a eṣa vājī hito nṛbhir viśvavin manasas patih |  
9.028.01c avyo vāram vi dhāvati ||  
9.028.02a eṣa pavitre akṣarat somo devebhyaḥ sutaḥ |  
9.028.02c viśvā dhāmāny āviśan ||  
9.028.03a eṣa devaḥ śubhāyate 'dhi yonāv amartyaḥ |  
9.028.03c vṛtrahā devavītamaḥ ||  
9.028.04a eṣa vṛṣā kanikradad daśabhir jāmbhir yataḥ |  
9.028.04c abhi droṇāni dhāvati ||  
9.028.05a eṣa sūryam arocayat pavamāno vicarṣaṇih |  
9.028.05c viśvā dhāmāni viśvavit ||  
9.028.06a eṣa śuṣmy adābhyaḥ somaḥ punāno arṣati |  
9.028.06c devāvīr aghaśamsahā ||

9.029.01a prāsya dhārā akṣaran vṛṣṇaḥ sutasyaujasā |  
9.029.01c devām anu prabhūṣataḥ ||  
9.029.02a saptim mṛjanti vedhaso gṛṇantaḥ kāravo girā |  
9.029.02c jyotir jajñānam ukthyaḥ ||  
9.029.03a suśahā soma tāni te punānāya prabhūvaso |  
9.029.03c vardhā samudram ukthyaḥ ||  
9.029.04a viśvā vasūni samjayan pavaśva soma dhārayā |  
9.029.04c inu dveṣāmsi sadhryak ||  
9.029.05a rakṣā su no araruṣaḥ svanāt samasya kasya cit |  
9.029.05c nido yatra mumucmahe ||  
9.029.06a endo pāṛthivaṁ rayim divyam pavaśva dhārayā |  
9.029.06c dyumantaṁ śuṣmam ā bhara ||

9.030.01a pra dhārā asya śuṣmiṇo vṛthā pavitre akṣaran |  
9.030.01c punāno vācam iṣyati ||  
9.030.02a indur hiyānaḥ sotṛbhir mṛjyamānaḥ kanikradat |  
9.030.02c iyarti vagnum indriyam ||  
9.030.03a ā naḥ śuṣmaṁ nṛṣāhyaṁ vīravantaḥ puruṣprham |  
9.030.03c pavaśva soma dhārayā ||  
9.030.04a pra somo ati dhārayā pavamāno asiṣyadat |  
9.030.04c abhi droṇāny āsadam ||  
9.030.05a apsu tvā madhumattamaṁ harim hinvanty adribhiḥ |  
9.030.05c indav indrāya pītaye ||  
9.030.06a sunotā madhumattamaṁ somam indrāya vajriṇe |  
9.030.06c cāruṁ śardhāya matsaram ||

9.031.01a pra somāsaḥ svādhyāḥ pavamānāso akramuḥ |  
9.031.01c rayim kṛṇvanti cetanam ||  
9.031.02a divas pṛthivyā adhi bhavendo dyumnavardhanaḥ |  
9.031.02c bhavā vājānām patih ||  
9.031.03a tubhyaṁ vātā abhipriyas tubhyam arṣanti sindhavaḥ |

- 9.031.03c soma vardhanti te mahaḥ ||  
9.031.04a ā pyāyasva sam etu te viśvataḥ soma vṛṣṇyam |  
9.031.04c bhavā vājasya saṅgathe ||  
9.031.05a tubhyaṃ gāvo ghr̥tam payo babhro duduhre akṣitam |  
9.031.05c varṣiṣṭhe adhi sānavi ||  
9.031.06a svāyudhasya te sato bhuvanasya pate vayam |  
9.031.06c indo sakhitvam uśmasi ||
- 9.032.01a pra somāso madacyutaḥ śravase no maghonaḥ |  
9.032.01c sutā vidathe akramuḥ ||  
9.032.02a ād īm tritasya yoṣaṇo harim̐ hinvanty adribhiḥ |  
9.032.02c indum indrāya pītaye ||  
9.032.03a ād īm hamso yathā gaṇam̐ viśvasyāvīvaśan matim |  
9.032.03c atyo na gobhir ajoyate ||  
9.032.04a ubhe somāvacākaśan mṛgo na takto arṣasi |  
9.032.04c sīdann ṛtasya yonim ā ||  
9.032.05a abhi gāvo anūṣata yoṣā jāram̐ iva priyam |  
9.032.05c agann ājīm̐ yathā hitam ||  
9.032.06a asme dhehi dyumad yaśo maghavadbhyaś ca mahyam̐ ca |  
9.032.06c sanim medhām̐ uta śravaḥ ||
- 9.033.01a pra somāso vipāścito 'pām̐ na yanty ūrmayaḥ |  
9.033.01c vanāni mahiṣā iva ||  
9.033.02a abhi droṇāni babhravaḥ śukrā ṛtasya dhārayā |  
9.033.02c vājam̐ gomantam̐ akṣaran ||  
9.033.03a sutā indrāya vāyave varuṇāya marudbhyaḥ |  
9.033.03c somā arṣanti viṣṇave ||  
9.033.04a tisro vāca ud īrate gāvo mimanti dhenavaḥ |  
9.033.04c harir̐ eti kanikradat ||  
9.033.05a abhi brahm̐ir̐ anūṣata yahv̐ir̐ ṛtasya mātaraḥ |  
9.033.05c marmṛjyante divaḥ śiśum ||  
9.033.06a rāyaḥ samudrām̐ś caturō 'smabhyam̐ soma viśvataḥ |  
9.033.06c ā pavasva sahasriṇaḥ ||
- 9.034.01a pra suvāno dhārayā tanendur hinvāno arṣati |  
9.034.01c rujad dṛḥhā vy ojasā ||  
9.034.02a suta indrāya vāyave varuṇāya marudbhyaḥ |  
9.034.02c somo arṣati viṣṇave ||  
9.034.03a vṛṣāṇam̐ vṛṣabhir̐ yataṃ sunvanti somam̐ adribhiḥ |  
9.034.03c duhanti śakmanā payaḥ ||  
9.034.04a bhuvat tritasya marjyo bhuvad indrāya matsaraḥ |  
9.034.04c sam̐ rūpair̐ ajoyate hariḥ ||  
9.034.05a abhīm̐ ṛtasya viṣṭapaṃ duhate pṛśnimātaraḥ |  
9.034.05c cāru priyatamaṃ haviḥ ||  
9.034.06a sam enam̐ ahrutā imā giro arṣanti sasrutāḥ |  
9.034.06c dhenūr̐ vāśro avīvaśat ||
- 9.035.01a ā naḥ pavasva dhārayā pavamāna rayim̐ pṛthum |  
9.035.01c yayā jyotir̐ vidāsi naḥ ||  
9.035.02a indo samudram̐īnkhaya pavasva viśvamejaya |  
9.035.02c rāyo dhartā na ojasā ||  
9.035.03a tvayā vīreṇa vīravo 'bhi śyāma pṛtanyataḥ |

9.035.03c kṣarā ṇo abhi vāryam ||  
9.035.04a pra vājam indur iṣyati siṣāsan vājasā ṛṣiḥ |  
9.035.04c vratā vidāna āyudhā ||  
9.035.05a taṁ gīrbhir vācamīṅkhayam punānaṁ vāsayāmasi |  
9.035.05c somaṁ janasya gopatim ||  
9.035.06a viśvo yasya vrata jano dādḥāra dharmaṇas pateḥ |  
9.035.06c punānasya prabhūvasoḥ ||

9.036.01a asarji rathyo yathā pavitre camvoḥ sutaḥ |  
9.036.01c kārṣman vājī ny akramīt ||  
9.036.02a sa vahniḥ soma jāgrviḥ pavasva devavīr ati |  
9.036.02c abhi kośam madhuścutam ||  
9.036.03a sa no jyotīṁṣi pūrvya pavamāna vi rocaya |  
9.036.03c kratve dakṣāya no hinu ||  
9.036.04a śumbhamāna ṛtāyubhir mṛjyamāno gabhastyoḥ |  
9.036.04c pavate vāre avyaye ||  
9.036.05a sa viśvā dāśuṣe vasu somo divyāni pārthivā |  
9.036.05c pavatām āntarikṣyā ||  
9.036.06a ā divas pṛṣṭham aśvayur gavyayuh soma rohasi |  
9.036.06c vīrayuḥ śavasas pate ||

9.037.01a sa sutaḥ pītaye vṛṣā somaḥ pavitre arṣati |  
9.037.01c vighnan rakṣāṁsi devayuh ||  
9.037.02a sa pavitre vicakṣaṇo harir arṣati dharmasiḥ |  
9.037.02c abhi yonim kanikradat ||  
9.037.03a sa vājī rocanā divaḥ pavamāno vi dhāvati |  
9.037.03c rakṣohā vāram avyayam ||  
9.037.04a sa tritasyādhi sānavi pavamāno arocayat |  
9.037.04c jāmbhiḥ sūryam saha ||  
9.037.05a sa vṛtrahā vṛṣā suto varivovid adābhyah |  
9.037.05c somo vājam ivāsarāt ||  
9.037.06a sa devaḥ kavineṣito 'bhi droṇāni dhāvati |  
9.037.06c indur indrāya mamhanā ||

9.038.01a eṣa u sya vṛṣā ratho 'vyo vārebhir arṣati |  
9.038.01c gacchan vājam sahasriṇam ||  
9.038.02a etaṁ tritasya yoṣaṇo hariṁ hinvanty adribhiḥ |  
9.038.02c indum indrāya pītaye ||  
9.038.03a etaṁ tyaṁ harito daśa marmṛjyante apasyuvaḥ |  
9.038.03c yābhir madāya śumbhate ||  
9.038.04a eṣa sya mānuṣīṣv ā śyeno na vikṣu sīdati |  
9.038.04c gacchañ jāro na yoṣitam ||  
9.038.05a eṣa sya madyo raso 'va caṣṭe divaḥ śīśuḥ |  
9.038.05c ya indur vāram āviśat ||  
9.038.06a eṣa sya pītaye suto harir arṣati dharmasiḥ |  
9.038.06c krandan yonim abhi priyam ||

9.039.01a āsur arṣa bṛhanmate pari priyeṇa dhāmnā |  
9.039.01c yatra devā iti bravan ||  
9.039.02a pariṣkrṇvann aniṣkrtaṁ janāya yātayann iṣaḥ |  
9.039.02c vṛṣṭim divaḥ pari srava ||  
9.039.03a suta eti pavitra ā tviṣim dadhāna ojasā |

- 9.039.03c vicakṣāṇo virocayan ||  
9.039.04a ayaṁ sa yo divas pari raghuyāmā pavitra ā |  
9.039.04c sindhor ūrmā vy akṣarat ||  
9.039.05a āvivāsan parāvato atho arvāvataḥ sutah |  
9.039.05c indrāya sicyate madhu ||  
9.039.06a samīcīnā anūṣata hariṁ hinvanty adribhiḥ |  
9.039.06c yonāv ṛtasya sīdata ||
- 9.040.01a punāno akramīd abhi viśvā mrdho vicarṣaṇiḥ |  
9.040.01c śumbhanti vipraṁ dhītibhiḥ ||  
9.040.02a ā yonim aruṇo ruhad gamad indraṁ vṛṣā sutah |  
9.040.02c dhruve sadasī sīdati ||  
9.040.03a nū no rayim mahām indo 'smabhyaṁ soma viśvataḥ |  
9.040.03c ā pavasva sahasriṇam ||  
9.040.04a viśvā soma pavamāna dyumnānīndav ā bhara |  
9.040.04c vidāḥ sahasriṇīr iṣaḥ ||  
9.040.05a sa naḥ punāna ā bhara rayim stotre suvīryam |  
9.040.05c jaritur vardhayā girah ||  
9.040.06a punāna indav ā bhara soma dvibarhasaṁ rayim |  
9.040.06c vṛṣann indo na ukthyam ||
- 9.041.01a pra ye gāvo na bhūrṇayas tveṣā ayāso akramuḥ |  
9.041.01c ghnantaḥ kṛṣṇām apa tvacam ||  
9.041.02a suvitasya manāmahe 'ti setum durāvyam |  
9.041.02c sāhvāmso dasyum avratam ||  
9.041.03a śrṇve vṛṣter iva svanaḥ pavamānasya śuṣmiṇaḥ |  
9.041.03c caranti vidyuto divi ||  
9.041.04a ā pavasva mahīm iṣaṁ gomad indo hiraṇyavat |  
9.041.04c aśvāvad vājavat sutah ||  
9.041.05a sa pavasva vicarṣaṇa ā mahī rodasī pṛṇa |  
9.041.05c uṣāḥ sūryo na raśmibhiḥ ||  
9.041.06a pari ṇaḥ śarmayantyā dhārayā soma viśvataḥ |  
9.041.06c sarā raseva viṣṭapam ||
- 9.042.01a janayan rocanā divo janayann apsu sūryam |  
9.042.01c vasāno gā apo hariḥ ||  
9.042.02a eṣa pratnena manmanā devo devebhyas pari |  
9.042.02c dhārayā pavate sutah ||  
9.042.03a vāvṛdhānāya tūrvaye pavante vājasātaye |  
9.042.03c somāḥ sahasrapājasaḥ ||  
9.042.04a duhānaḥ pratnam it payaḥ pavitre pari śicyate |  
9.042.04c krandan devāṁ ajījanat ||  
9.042.05a abhi viśvāni vāryābhi devāṁ ṛtāvṛdhaḥ |  
9.042.05c somaḥ punāno arṣati ||  
9.042.06a goman naḥ soma vīravad aśvāvad vājavat sutah |  
9.042.06c pavasva bṛhatīr iṣaḥ ||
- 9.043.01a yo atya iva mṛjyate gobhir madāya haryataḥ |  
9.043.01c taṁ gīrbhir vāsayāmasi ||  
9.043.02a taṁ no viśvā avasyuvo girah śumbhanti pūrvathā |  
9.043.02c indum indrāya pītaye ||  
9.043.03a punāno yāti haryataḥ somo gīrbhiḥ pariṣkṛtaḥ |

9.043.03c viprasya medhyātitheḥ ||  
9.043.04a pavamāna vidā rayim asmabhyam soma suśriyam |  
9.043.04c indo sahasravarcasam ||  
9.043.05a indur atyo na vājasṛt kanikranti pavitra ā |  
9.043.05c yad akṣār ati devayuh ||  
9.043.06a pavasva vājasātaye viprasya gr̥nato vṛdhe |  
9.043.06c soma rāsva suvīryam ||

9.044.01a pra ṇa indo mahe tana ūrmiṁ na bibhrad arṣasi |  
9.044.01c abhi devāṁ ayāsyah ||  
9.044.02a matī juṣṭo dhiyā hitaḥ somo hinve parāvati |  
9.044.02c viprasya dhārayā kaviḥ ||  
9.044.03a ayam deveṣu jāgrviḥ suta eti pavitra ā |  
9.044.03c somo yāti vicarṣaṇiḥ ||  
9.044.04a sa naḥ pavasva vājayus cakrāṇas cārum adhvaram |  
9.044.04c barhiṣmāṁ ā vivāsati ||  
9.044.05a sa no bhagāya vāyave vipravīraḥ sadāvṛdhaḥ |  
9.044.05c somo deveṣv ā yamat ||  
9.044.06a sa no adya vasuttaye kratuvid gātuvittamaḥ |  
9.044.06c vājam jeṣi śravo bṛhat ||

9.045.01a sa pavasva madāya kam nṛcakṣā devavītaye |  
9.045.01c indav indrāya pītaye ||  
9.045.02a sa no arṣābhi dūtyam tvam indrāya tośase |  
9.045.02c devān sakhibhya ā varam ||  
9.045.03a uta tvām aruṇam vayam gobhir añjmo madāya kam |  
9.045.03c vi no rāye duro vṛdhi ||  
9.045.04a aty ū pavitram akramīd vājī dhuram na yāmani |  
9.045.04c indur deveṣu patyate ||  
9.045.05a sam ī sakhāyo asvaran vane krīlantam atyavim |  
9.045.05c indum nāvā anūṣata ||  
9.045.06a tayā pavasva dhārayā yayā pīto vicakṣase |  
9.045.06c indo stotre suvīryam ||

9.046.01a aṣṛgran devavītaye 'tyāsaḥ kṛtvya iva |  
9.046.01c kṣarantaḥ parvatāvṛdhaḥ ||  
9.046.02a pariṣkṛtāsa indavo yoṣeva pitryāvati |  
9.046.02c vāyum somā aṣṛkṣata ||  
9.046.03a ete somāsa indavaḥ prayasvantaś camū sutāḥ |  
9.046.03c indram vardhanti karmabhiḥ ||  
9.046.04a ā dhāvātā suhastyah śukrā gr̥bhñita manthinā |  
9.046.04c gobhiḥ śrīñita matsaram ||  
9.046.05a sa pavasva dhanamjaya prayantā rādhaso mahaḥ |  
9.046.05c asmabhyam soma gātuvit ||  
9.046.06a etam mṛjanti marjyam pavamānam daśa kṣipaḥ |  
9.046.06c indrāya matsaram madam ||

9.047.01a ayā somaḥ sukṛtyayā mahaś cid abhy avardhata |  
9.047.01c mandāna ud vṛṣāyate ||  
9.047.02a kṛtānīd asya kartvā cetante dasyutarhaṇā |  
9.047.02c ṛṇā ca dhṛṣṇus cayate ||  
9.047.03a āt soma indriyo raso vajraḥ sahasrasā bhuvat |

- 9.047.03c uktham yad asya jāyate ||  
9.047.04a svayam kavir vidhartari viprāya ratnam icchati |  
9.047.04c yadī marmṛjyate dhiyaḥ ||  
9.047.05a siṣāsātū rayīṇām vāješv arvatām iva |  
9.047.05c bhareṣu jigyuṣām asi ||
- 9.048.01a tam tvā nṛmṇāni bibhratam sadhastheṣu maho divaḥ |  
9.048.01c cāruṁ sukrṛtyayemahe ||  
9.048.02a samvṛktadhṛṣṇum ukthyam mahāmahivratam madam |  
9.048.02c śatam puro ruruksaṇim ||  
9.048.03a atas tvā rayim abhi rājānam sukrato divaḥ |  
9.048.03c suparṇo avyathir bharat ||  
9.048.04a viśvasmā it svar dṛṣe sādharmaṇam rajasturam |  
9.048.04c gopām ṛtasya vir bharat ||  
9.048.05a adhā hinvāna indriyam jyāyo mahitvam ānaśe |  
9.048.05c abhiṣṭikṛd vicarṣaṇiḥ ||
- 9.049.01a pavasva vṛṣṭim ā su no 'pām ūrmiṁ divas pari |  
9.049.01c ayakṣmā bṛhatīr iṣaḥ ||  
9.049.02a tayā pavasva dhārayā yayā gāva ihāgaman |  
9.049.02c janyāsa upa no grham ||  
9.049.03a ghṛtam pavasva dhārayā yajñeṣu devavītamah |  
9.049.03c asmabhyam vṛṣṭim ā pava ||  
9.049.04a sa na ūrje vy avyayam pavitraṁ dhāva dhārayā |  
9.049.04c devāsaḥ śṛṇavan hi kam ||  
9.049.05a pavamāno asiṣyadad rakṣāmsy apajaṅghanat |  
9.049.05c pratnavad rocayan rucaḥ ||
- 9.050.01a ut te śuṣmāsa īrate sindhor ūrmer iva svanaḥ |  
9.050.01c vāṇasya codayā pavim ||  
9.050.02a prasave ta ud īrate tisro vāco makhasyuvaḥ |  
9.050.02c yad avya eṣi sānavi ||  
9.050.03a avyo vāre pari priyam hariṁ hinvanty adribhiḥ |  
9.050.03c pavamānam madhuścutam ||  
9.050.04a ā pavasva madintama pavitraṁ dhārayā kave |  
9.050.04c arkasya yonim āsadam ||  
9.050.05a sa pavasva madintama gobhir añjāno aktubhiḥ |  
9.050.05c indav indrāya pītaye ||
- 9.051.01a adhvaryo adribhiḥ sutam somam pavitra ā srja |  
9.051.01c punihindrāya pātave ||  
9.051.02a divaḥ pīyūṣam uttamam somam indrāya vajriṇe |  
9.051.02c sunotā madhumattamam ||  
9.051.03a tava tya indo andhaso devā madhor vy aśnate |  
9.051.03c pavamānasya marutaḥ ||  
9.051.04a tvarṁ hi soma vardhayan suto madāya bhūrṇaye |  
9.051.04c vṛṣan stotāram ūtaye ||  
9.051.05a abhy arṣa vicakṣaṇa pavitraṁ dhārayā sutaḥ |  
9.051.05c abhi vājam uta śravaḥ ||
- 9.052.01a pari dyukṣaḥ sanadrayir bharad vājam no andhasā |  
9.052.01c suvāno arṣa pavitra ā ||

9.052.02a tava pratnebhir adhvabhir avyo vāre pari priyaḥ |  
9.052.02c sahasradhāro yāt tanā ||  
9.052.03a carur na yas tam tñkhayendo na dānam tñkhaya |  
9.052.03c vadhair vadhasnav tñkhaya ||  
9.052.04a ni śuṣmam indav eṣām puruhūta janānām |  
9.052.04c yo asmāñ ādideśati ||  
9.052.05a śataṁ na inda ūtibhiḥ sahasraṁ vā śucīnām |  
9.052.05c pavasva mañhayadrayiḥ ||

9.053.01a ut te śuṣmāso asthū rakṣo bhindanto adrivaḥ |  
9.053.01c nudasva yāḥ parisṛdhaḥ ||  
9.053.02a ayā nijaghnir ojasā rathasañge dhane hite |  
9.053.02c stavā abibhyuṣā hṛdā ||  
9.053.03a asya vratāni nādhr̥ṣe pavamānasya dūḍhya |  
9.053.03c ruja yas tvā pṛtanyati ||  
9.053.04a tañ hinvanti madacyutañ hariṁ nadīṣu vājinam |  
9.053.04c indum indrāya matsaram ||

9.054.01a asya pratnām anu dyutañ śukrañ duduhre ahrayaḥ |  
9.054.01c payaḥ sahasrasām ṛṣim ||  
9.054.02a ayam sūrya ivopadṛg ayam sarāmsi dhāvati |  
9.054.02c sapta pravata ā divam ||  
9.054.03a ayam viśvāni tiṣṭhati punāno bhuvanopari |  
9.054.03c somo devo na sūryaḥ ||  
9.054.04a pari ṇo devavītaye vājāñ arṣasi gomataḥ |  
9.054.04c punāna indav indrayuḥ ||

9.055.01a yavañ-yavañ no andhasā puṣtam-puṣtam pari srava |  
9.055.01c soma viśvā ca saubhagā ||  
9.055.02a indo yathā tava stavo yathā te jātam andhasaḥ |  
9.055.02c ni barhiṣi priye sadaḥ ||  
9.055.03a uta no govid aśvavit pavasva somāndhasā |  
9.055.03c makṣūtamebhir ahabhiḥ ||  
9.055.04a yo jināti na jīyate hanti śatrum abhītya |  
9.055.04c sa pavasva sahasrajit ||

9.056.01a pari soma ṛtam bṛhad āsuḥ pavitre arṣati |  
9.056.01c vighnan rakṣāmsi devayuḥ ||  
9.056.02a yat somo vājam arṣati śataṁ dhārā apasyuvaḥ |  
9.056.02c indrasya sakhyam āviśan ||  
9.056.03a abhi tvā yoṣaṇo daśa jāraṁ na kanyānūṣata |  
9.056.03c mṛjyase soma sātaye ||  
9.056.04a tvam indrāya viṣṇave svādur indo pari srava |  
9.056.04c nṛñ stotṛñ pāhy amhasaḥ ||

9.057.01a pra te dhārā asaścato divo na yanti vṛṣṭayaḥ |  
9.057.01c acchā vājam sahasriṇam ||  
9.057.02a abhi priyāni kāvyā viśvā cakṣāṇo arṣati |  
9.057.02c haris tuñjāna āyudhā ||  
9.057.03a sa marmṛjāna āyubhir ibho rājeva suvrataḥ |  
9.057.03c śyeno na vaṁsu śīdati ||  
9.057.04a sa no viśvā divo vasūto pṛthivyā adhi |

9.057.04c punāna indav ā bhara ||

9.058.01a tarat sa mandī dhāvati dhārā sutasyāndhasaḥ |

9.058.01c tarat sa mandī dhāvati ||

9.058.02a usrā veda vasūnām martasya devy avasaḥ |

9.058.02c tarat sa mandī dhāvati ||

9.058.03a dhvasrayoḥ puruṣantyor ā sahasrāṇi dadmahe |

9.058.03c tarat sa mandī dhāvati ||

9.058.04a ā yayos trimśataṁ tanā sahasrāṇi ca dadmahe |

9.058.04c tarat sa mandī dhāvati ||

9.059.01a pavasva gojid aśvajid viśvajit soma raṇyajit |

9.059.01c prajāvad ratnam ā bhara ||

9.059.02a pavasvādbhyo adābhyaḥ pavasvausadhībhyaḥ |

9.059.02c pavasva dhiṣaṇābhyaḥ ||

9.059.03a tvaṁ soma pavamāno viśvāni duritā tara |

9.059.03c kaviḥ sīda ni barhiṣi ||

9.059.04a pavamāna svar vido jāyamāno bhavo mahān |

9.059.04c indo viśvāṁ abhīd asi ||

9.060.01a pra gāyatrena gāyata pavamānaṁ vicarṣaṇim |

9.060.01c indurṁ sahasracakṣasam ||

9.060.02a taṁ tvā sahasracakṣasam atho sahasrabharṇasam |

9.060.02c ati vāram apāviṣuḥ ||

9.060.03a ati vārān pavamāno asiṣyadat kalaśāṁ abhi dhāvati |

9.060.03c indrasya hārdy āviśan ||

9.060.04a indrasya soma rādhase śam pavasva vicarṣaṇe |

9.060.04c prajāvad reta ā bhara ||

9.061.01a ayā vītī pari srava yas ta indo madeṣv ā |

9.061.01c avāhan navatīr nava ||

9.061.02a puraḥ sadya ithādhiye divodāsāya śambaram |

9.061.02c adha tyaṁ turvaśaṁ yadum ||

9.061.03a pari ṇo aśvam aśvavid gomad indo hiraṇyavat |

9.061.03c kṣarā sahasriṇīr iṣaḥ ||

9.061.04a pavamānasya te vayam pavitram abhyundataḥ |

9.061.04c sakhitvam ā vṛṇīmahe ||

9.061.05a ye te pavitram ūrmayo bhikṣaranti dhārayā |

9.061.05c tebhīr naḥ soma mṛṇaya ||

9.061.06a sa naḥ punāna ā bhara rayim vīravatīm iṣam |

9.061.06c īśānaḥ soma viśvataḥ ||

9.061.07a etam u tyaṁ daśa kṣipo mṛjanti sindhumātaram |

9.061.07c sam ādityebhīr akhyata ||

9.061.08a sam indreṇota vāyunā suta eti pavitra ā |

9.061.08c saṁ sūryasya raśmibhiḥ ||

9.061.09a sa no bhagāya vāyave pūṣṇe pavasva madhumān |

9.061.09c cārur mitre varuṇe ca ||

9.061.10a uccā te jātam andhaso divi ṣad bhūmy ā dade |

9.061.10c ugraṁ śarma mahi śravaḥ ||

9.061.11a enā viśvāny aya ā dyumnāni mānuṣāṇām |

9.061.11c siṣāsanto vanāmahe ||

9.061.12a sa na indrāya yajyave varuṇāya marudbhyaḥ |

9.061.12c varivovit pari srava ||  
 9.061.13a upo šu jātam apturam gobhir bhaṅgam pariṣkṛtam |  
 9.061.13c indum devā ayāsiṣuḥ ||  
 9.061.14a tam id vardhantu no giro vatsam samśiśvarīr iva |  
 9.061.14c ya indrasya hṛdamsaniḥ ||  
 9.061.15a arṣā ṇaḥ soma śam gave dhukṣasva pipyuṣīm iṣam |  
 9.061.15c vardhā samudram ukthyam ||  
 9.061.16a pavamāno ajījanad divaś citram na tanyatum |  
 9.061.16c jyotir vaiśvānaram bṛhat ||  
 9.061.17a pavamānasya te raso mado rājann aducchunaḥ |  
 9.061.17c vi vāram avyam arṣati ||  
 9.061.18a pavamāna rasas tava dakṣo vi rājati dyumān |  
 9.061.18c jyotir viśvam svar dṛśe ||  
 9.061.19a yas te mado vareṇyas tenā pavasvāndhasā |  
 9.061.19c devāvīr aghaśamsahā ||  
 9.061.20a jaghnir vṛtram amitriyam sasnir vājam dive-dive |  
 9.061.20c goṣā u aśvasā asi ||  
 9.061.21a sammiślo aruṣo bhava sūpasthābhir na dhenubhiḥ |  
 9.061.21c sīdañ chyeno na yonim ā ||  
 9.061.22a sa pavasva ya āvithendram vṛtrāya hantave |  
 9.061.22c vavrivāmsam mahīr apaḥ ||  
 9.061.23a suvīrāso vayam dhanā jayema soma mīdhvaḥ |  
 9.061.23c punāno vardha no girah ||  
 9.061.24a tvotāsas tavāvasā syāma vanvanta āmuraḥ |  
 9.061.24c soma vratesu jāgrhi ||  
 9.061.25a apaghnān pavate mṛdho 'pa somo arāvṇaḥ |  
 9.061.25c gacchann indrasya niṣkṛtam ||  
 9.061.26a maho no rāya ā bhara pavamāna jahī mṛdhaḥ |  
 9.061.26c rāsvendo vīravād yaśaḥ ||  
 9.061.27a na tvā śatam cana hruto rādho ditsantam ā minan |  
 9.061.27c yat punāno makhasyase ||  
 9.061.28a pavasvendo vṛṣā sutaḥ kṛdhī no yaśaso jane |  
 9.061.28c viśvā apa dviṣo jahi ||  
 9.061.29a asya te sakhye vayam tavendo dyumna uttame |  
 9.061.29c sāsahyāma pṛtanyataḥ ||  
 9.061.30a yā te bhīmāny āyudhā tigmani santi dhūrvāṇe |  
 9.061.30c rakṣā samasya no nidaḥ ||

9.062.01a ete aśgram indavas tiraḥ pavitram āśavaḥ |  
 9.062.01c viśvāny abhi saubhagā ||  
 9.062.02a vighnanto duritā puru sugā tokāya vājinaḥ |  
 9.062.02c tanā kṛṇvanto arvate ||  
 9.062.03a kṛṇvanto varivo gave 'bhy arṣanti suṣṭutim |  
 9.062.03c ilām asmabhyam samyatam ||  
 9.062.04a asāvy amśur madāyāpsu dakṣo giriṣṭhāḥ |  
 9.062.04c śyeno na yonim āsadat ||  
 9.062.05a śubhram andho devavātam apsu dhūto nṛbhiḥ sutaḥ |  
 9.062.05c svadanti gāvaḥ payobhiḥ ||  
 9.062.06a ād īm aśvam na hetāro 'sūśubhann amṛtāya |  
 9.062.06c madhvo rasam sadhamāde ||  
 9.062.07a yās te dhārā madhuścuto 'sṛgram inda uttaye |  
 9.062.07c tābhiḥ pavitram āsadaḥ ||

9.062.08a so arṣendrāya pītaye tiro romāṅy avyayā |  
 9.062.08c sīdan yonā vaneṣv ā ||  
 9.062.09a tvam indo pari srava svādiṣṭho aṅgirobhyaḥ |  
 9.062.09c varivovid ghṛtam payah ||  
 9.062.10a ayaṁ vicarṣaṇir hitaḥ pavamānaḥ sa cetati |  
 9.062.10c hinvāna āpyam bṛhat ||  
 9.062.11a eṣa vṛṣā vṛṣavrataḥ pavamāno aśastihā |  
 9.062.11c karad vasūni dāśuṣe ||  
 9.062.12a ā pavasva sahasriṇaṁ rayiṁ gomantam aśvinam |  
 9.062.12c puruścandram puruspr̥ham ||  
 9.062.13a eṣa sya pari śicyate marmṛjyamāna āyubhiḥ |  
 9.062.13c urugāyaḥ kavikratuḥ ||  
 9.062.14a sahasrotiḥ śatāmagho vimāno rajasaḥ kaviḥ |  
 9.062.14c indrāya pavate madaḥ ||  
 9.062.15a girā jāta iha stuta indur indrāya dhīyate |  
 9.062.15c vir yonā vasatāv iva ||  
 9.062.16a pavamānaḥ suto nṛbhiḥ somo vājam ivāsarāt |  
 9.062.16c camūṣu śakmanāsadam ||  
 9.062.17a taṁ tripr̥ṣṭhe trivandhure rathe yuñjanti yātave |  
 9.062.17c r̥ṣiṇāṁ sapta dhītibhiḥ ||  
 9.062.18a taṁ sotāro dhanaspr̥tam āsum vājāya yātave |  
 9.062.18c hariṁ hinota vājinam ||  
 9.062.19a āviśan kalaśaṁ suto viśvā arṣann abhi śriyaḥ |  
 9.062.19c śūro na goṣu tiṣṭhati ||  
 9.062.20a ā ta indo madāya kam payo duhanty āyavaḥ |  
 9.062.20c devā devebhyo madhu ||  
 9.062.21a ā naḥ somam pavitra ā sr̥jatā madhumattamam |  
 9.062.21c devebhyo devaśruttamam ||  
 9.062.22a ete somā ar̥kṣata gr̥ṇānāḥ śravase mahe |  
 9.062.22c madintamasya dhārayā ||  
 9.062.23a abhi gavyāni vītaye nṛmṇā punāno arṣasi |  
 9.062.23c sanadvājaḥ pari srava ||  
 9.062.24a uta no gomatīr iṣo viśvā arṣa pariṣṭubhaḥ |  
 9.062.24c gr̥ṇāno jamadagninā ||  
 9.062.25a pavasva vāco agriyaḥ soma citrābhir ūtibhiḥ |  
 9.062.25c abhi viśvāni kāvyā ||  
 9.062.26a tvar̥ṁ samudriyā apo 'griyo vāca īrayan |  
 9.062.26c pavasva viśvamejaya ||  
 9.062.27a tubhyemā bhuvanā kave mahimne soma tasthire |  
 9.062.27c tubhyam arṣanti sindhavaḥ ||  
 9.062.28a pra te divo na vṛṣṭayo dhārā yanty asaścataḥ |  
 9.062.28c abhi śukrām upastiram ||  
 9.062.29a indrāyendum punītanograṁ dakṣāya sādhanam |  
 9.062.29c īśānaṁ vītirādhasam ||  
 9.062.30a pavamāna r̥taḥ kaviḥ somaḥ pavitram āsadat |  
 9.062.30c dadhat stotre suvīryam ||  
  
 9.063.01a ā pavasva sahasriṇaṁ rayiṁ soma suvīryam |  
 9.063.01c asme śravāṁsi dhāraya ||  
 9.063.02a iṣam ūrjaṁ ca pinvasa indrāya matsarintamaḥ |  
 9.063.02c camūṣv ā ni śīdasi ||  
 9.063.03a suta indrāya viṣṇave somaḥ kalaśe akṣarat |

9.063.03c madhumāṁ astu vāyave ||  
 9.063.04a ete asṛgram āśavo 'ti hvarāṁsi babhravaḥ |  
 9.063.04c somā ṛtasya dhārayā ||  
 9.063.05a indraṁ vardhanto apturaḥ kṛṇvanto viśvam āryam |  
 9.063.05c apaghnanto arāvṇaḥ ||  
 9.063.06a sutā anu svam ā rajo 'bhy arṣanti babhravaḥ |  
 9.063.06c indraṁ gacchanta indavaḥ ||  
 9.063.07a ayā pavasva dhārayā yayā sūryam arocayaḥ |  
 9.063.07c hinvāno mānuṣīr apaḥ ||  
 9.063.08a ayukta sūra etaśam pavamāno manāv adhi |  
 9.063.08c antarikṣeṇa yātave ||  
 9.063.09a uta tyā harito daśa sūro ayukta yātave |  
 9.063.09c indur indra iti bruvan ||  
 9.063.10a parīto vāyave sutam gira indrāya matsaram |  
 9.063.10c avyo vāreṣu siñcata ||  
 9.063.11a pavamāna vidā rayim asmabhyam soma duṣṭaram |  
 9.063.11c yo dūnāśo vanuṣyatā ||  
 9.063.12a abhy arṣa sahasriṇam rayim gomantam aśvinam |  
 9.063.12c abhi vājam uta śravaḥ ||  
 9.063.13a somo devo na sūryo 'dribhiḥ pavate sutah |  
 9.063.13c dadhānaḥ kalaśe rasam ||  
 9.063.14a ete dhāmāny āryā śukrā ṛtasya dhārayā |  
 9.063.14c vājam gomantam akṣaran ||  
 9.063.15a sutā indrāya vajriṇe somāso dadhyāśiraḥ |  
 9.063.15c pavitram aty akṣaran ||  
 9.063.16a pra soma madhumattamo rāye arṣa pavitra ā |  
 9.063.16c mado yo devavītamah ||  
 9.063.17a tam ī mrjanty āyavo harim nadīṣu vājinam |  
 9.063.17c indum indrāya matsaram ||  
 9.063.18a ā pavasva hiraṇyavad aśvāvāt soma vīravat |  
 9.063.18c vājam gomantam ā bhara ||  
 9.063.19a pari vāje na vājayum avyo vāreṣu siñcata |  
 9.063.19c indrāya madhumattamam ||  
 9.063.20a kavim mrjanti marjyam dhībhir viprā avasyavaḥ |  
 9.063.20c vṛṣā kanikrad arṣati ||  
 9.063.21a vṛṣaṇam dhībhir apturaṁ somam ṛtasya dhārayā |  
 9.063.21c matī viprāḥ sam asvaran ||  
 9.063.22a pavasva devāyusaḥ indraṁ gacchatu te madaḥ |  
 9.063.22c vāyum ā roha dharmaṇā ||  
 9.063.23a pavamāna ni tośase rayim soma śravāyyam |  
 9.063.23c priyaḥ samudram ā viśa ||  
 9.063.24a apaghnan pavase mṛdhaḥ kratuvit soma matsaraḥ |  
 9.063.24c nudasvādevayum janam ||  
 9.063.25a pavamānā asṛkṣata somāḥ śukrāsa indavaḥ |  
 9.063.25c abhi viśvāni kāvyā ||  
 9.063.26a pavamānāsa āśavaḥ śubhrā asṛgram indavaḥ |  
 9.063.26c ghnanto viśvā apa dviṣaḥ ||  
 9.063.27a pavamānā divas pary antarikṣād asṛkṣata |  
 9.063.27c pṛthivyā adhi sānavi ||  
 9.063.28a punānaḥ soma dhārayendo viśvā apa sridhaḥ |  
 9.063.28c jahi rakṣāṁsi suktrato ||  
 9.063.29a apaghnan soma rakṣaso 'bhy arṣa kanikradat |

9.063.29c dyumantaṁ śuṣṁam uttamam ||  
 9.063.30a asme vasūni dhāraya soma divyāni pārthivā |  
 9.063.30c indo viśvāni vāryā ||  
  
 9.064.01a vṛṣā soma dyumāṁ asi vṛṣā deva vṛṣavrataḥ |  
 9.064.01c vṛṣā dharmāṇi dadhiṣe ||  
 9.064.02a vṛṣṇas te vṛṣṇyaṁ śavo vṛṣā vanaṁ vṛṣā madaḥ |  
 9.064.02c satyaṁ vṛṣṇan vṛṣed asi ||  
 9.064.03a aśvo na cakrado vṛṣā saṁ gā indo sam arvataḥ |  
 9.064.03c vi no rāye duro vṛdhi ||  
 9.064.04a asṛkṣata pra vājino gavyā somāso aśvayā |  
 9.064.04c śukrāso vīrayāśavaḥ ||  
 9.064.05a śumbhamānā ṛtāyubhir mṛjyamānā gabhastyoḥ |  
 9.064.05c pavante vāre avyaye ||  
 9.064.06a te viśvā dāśuṣe vasu somā divyāni pārthivā |  
 9.064.06c pavantām āntarikṣyā ||  
 9.064.07a pavamānasya viśvavit pra te sargā asṛkṣata |  
 9.064.07c sūryasyeva na raśmayāḥ ||  
 9.064.08a ketuṁ kṛṇvan divas pari viśvā rūpābhy arṣasi |  
 9.064.08c samudraḥ soma pinvase ||  
 9.064.09a hinvāno vācam iṣyasi pavamāna vidharmaṇi |  
 9.064.09c akrān devo na sūryaḥ ||  
 9.064.10a induḥ paviṣṭa cetanaḥ priyaḥ kavīnām matī |  
 9.064.10c sṛjad aśvaṁ rathīr iva ||  
 9.064.11a ūrmir yas te pavitra ā devāvīḥ paryakṣarat |  
 9.064.11c sīdann ṛtasya yonim ā ||  
 9.064.12a sa no arṣa pavitra ā mado yo devavītamaḥ |  
 9.064.12c indav indrāya pītaye ||  
 9.064.13a iṣe pavasva dhārayā mṛjyamāno manīṣibhiḥ |  
 9.064.13c indo rucābhi gā ihi ||  
 9.064.14a punāno varivas kṛdhy ūrjam janāya girvaṇaḥ |  
 9.064.14c hare sṛjāna āśiram ||  
 9.064.15a punāno devavītaya indrasya yāhi niṣkṛtam |  
 9.064.15c dyutāno vājibhir yataḥ ||  
 9.064.16a pra hinvānāsa indavo 'cchā samudram āśavaḥ |  
 9.064.16c dhiyā jūtā asṛkṣata ||  
 9.064.17a marmṛjānāsa āyavo vṛthā samudram indavaḥ |  
 9.064.17c agmann ṛtasya yonim ā ||  
 9.064.18a pari ṇo yāhy asmayur viśvā vasūny ojasā |  
 9.064.18c pāhi naḥ śarma vīravat ||  
 9.064.19a mimāti vahnir etaśaḥ padaṁ yujāna ṛkvabhiḥ |  
 9.064.19c pra yat samudra āhitaḥ ||  
 9.064.20a ā yad yonim hiraṇyayam āśur ṛtasya sīdati |  
 9.064.20c jahāty apracetasaḥ ||  
 9.064.21a abhi venā anūṣateyakṣanti pracetasāḥ |  
 9.064.21c majjanty avicetasāḥ ||  
 9.064.22a indrāyendo marutvate pavasva madhumattamaḥ |  
 9.064.22c ṛtasya yonim āśadam ||  
 9.064.23a taṁ tvā viprā vacovidāḥ pari ṣkṛṇvanti vedhasāḥ |  
 9.064.23c saṁ tvā mṛjanty āyavaḥ ||  
 9.064.24a rasam te mitro aryamā pibanti varuṇaḥ kave |  
 9.064.24c pavamānasya marutaḥ ||

9.064.25a tvaṁ soma vipāścitam punāno vācam iṣyasi |  
 9.064.25c indo sahasrabharṇasam ||  
 9.064.26a uto sahasrabharṇasaṁ vācam soma makhasyuvam |  
 9.064.26c punāna indav ā bhara ||  
 9.064.27a punāna indav eṣāṁ puruhūta janānām |  
 9.064.27c priyaḥ samudram ā viśa ||  
 9.064.28a davidyutatyā rucā pariṣṭobhantya kṛpā |  
 9.064.28c somāḥ śukrā gavāśiraḥ ||  
 9.064.29a hinvāno hetṛbhir yata ā vājam vājy akramīt |  
 9.064.29c sīdanto vanuṣo yathā ||  
 9.064.30a ṛdhak soma svastaye saṁjagmāno divaḥ kaviḥ |  
 9.064.30c pavasva sūryo dṛṣe ||

9.065.01a hinvanti sūram usrayaḥ svasāro jāmayas patim |  
 9.065.01c mahām indum mahīyuvaḥ ||  
 9.065.02a pavamāna rucā-rucā devo devebhyas pari |  
 9.065.02c viśvā vasūny ā viśa ||  
 9.065.03a ā pavamāna suṣṭutim vṛṣṭim devebhyo duvaḥ |  
 9.065.03c iṣe pavasva saṁyatam ||  
 9.065.04a vṛṣā hy asi bhānunā dyumantaṁ tvā havāmahe |  
 9.065.04c pavamāna svādhyāḥ ||  
 9.065.05a ā pavasva suvīryam mandamānaḥ svāyudha |  
 9.065.05c iho ṣv indav ā gahi ||  
 9.065.06a yad adbhiḥ pariṣicyase mṛjyamāno gabhastyoḥ |  
 9.065.06c druṇā sadhastham aśnuṣe ||  
 9.065.07a pra somāya vyaśvavat pavamānāya gāyata |  
 9.065.07c mahe sahasracakṣase ||  
 9.065.08a yasya varṇam madhuścutam harim hinvanty adribhiḥ |  
 9.065.08c indum indrāya pītaye ||  
 9.065.09a tasya te vājino vayam viśvā dhanāni jigyuṣaḥ |  
 9.065.09c sakhitvam ā vṛṇīmahe ||  
 9.065.10a vṛṣā pavasva dhārayā marutvate ca matsaraḥ |  
 9.065.10c viśvā dadhāna ojasā ||  
 9.065.11a taṁ tvā dhartāram oṅyoḥ pavamāna svardṛśam |  
 9.065.11c hinve vājeṣu vājīnam ||  
 9.065.12a ayā citto vipānayā hariḥ pavasva dhārayā |  
 9.065.12c yujam vājeṣu codaya ||  
 9.065.13a ā na indo mahīm iṣam pavasva viśvadarśataḥ |  
 9.065.13c asmabhyam soma gātuvit ||  
 9.065.14a ā kalaśā anūṣatendo dhārābhir ojasā |  
 9.065.14c endrasya pītaye viśa ||  
 9.065.15a yasya te madyam rasam tīvram duhanty adribhiḥ |  
 9.065.15c sa pavasvābhīmātihā ||  
 9.065.16a rājā medhābhir īyate pavamāno manāv adhi |  
 9.065.16c antarikṣeṇa yātave ||  
 9.065.17a ā na indo śatagvīnam gavām poṣam svaśvyam |  
 9.065.17c vahā bhagattim ūtaye ||  
 9.065.18a ā naḥ soma saho juvo rūpam na varcase bhara |  
 9.065.18c suṣvāṇo devavītaye ||  
 9.065.19a arṣā soma dyumattamo 'bhi droṇāni roruvat |  
 9.065.19c sīdañ chyeno na yonim ā ||  
 9.065.20a apsā indrāya vāyave varuṇāya marudbhyāḥ |

9.065.20c somo arṣati viṣṇave ||  
 9.065.21a iṣam tokāya no dadhad asmabhyam soma viśvataḥ |  
 9.065.21c ā pavasva sahasriṇam ||  
 9.065.22a ye somāsaḥ parāvati ye arvāvati sunvire |  
 9.065.22c ye vādaḥ śaryañāvati ||  
 9.065.23a ya ārjikeṣu kṛtvasu ye madhye pastyānām |  
 9.065.23c ye vā janeṣu pañcasu ||  
 9.065.24a te no vṛṣṭim divas pari pavantām ā suvīryam |  
 9.065.24c suvānā devāsa indavaḥ ||  
 9.065.25a pavate haryato harir grṇāno jamadagninā |  
 9.065.25c hinvāno gor adhi tvaci ||  
 9.065.26a pra śukrāso vayojuvo hinvānāso na saptayaḥ |  
 9.065.26c śrīñānā apsu mṛñjata ||  
 9.065.27a tam tvā suteṣv ābhuvo hinvire devatātaye |  
 9.065.27c sa pavasvānayā rucā ||  
 9.065.28a ā te dakṣam mayobhuvanā vahnim adyā vṛñīmahe |  
 9.065.28c pāntam ā puruspr̥ham ||  
 9.065.29a ā mandram ā vareṇyam ā vipram ā manīṣiṇam |  
 9.065.29c pāntam ā puruspr̥ham ||  
 9.065.30a ā rayim ā sucetunam ā sukrato tanūṣv ā |  
 9.065.30c pāntam ā puruspr̥ham ||

9.066.01a pavasva viśvacarṣaṇe 'bhi viśvāni kāvyā |  
 9.066.01c sakhā sakhibhya īdyah ||  
 9.066.02a tābhyām viśvasya rājasi ye pavamāna dhāmanī |  
 9.066.02c pratīcī soma tasthatuḥ ||  
 9.066.03a pari dhāmāni yāni te tvarim somāsi viśvataḥ |  
 9.066.03c pavamāna ṛtubhiḥ kave ||  
 9.066.04a pavasva janayann iṣo 'bhi viśvāni vāryā |  
 9.066.04c sakhā sakhibhya ūtaye ||  
 9.066.05a tava śukrāso arcayo divas pṛṣṭhe vi tanvate |  
 9.066.05c pavitraṁ soma dhāmabhiḥ ||  
 9.066.06a taveme sapta sindhavaḥ praśiṣam soma sisrate |  
 9.066.06c tubhyam dhāvanti dhenavaḥ ||  
 9.066.07a pra soma yāhi dhārayā suta indrāya matsaraḥ |  
 9.066.07c dadhāno akṣiti śravaḥ ||  
 9.066.08a sam u tvā dhībhir asvaran hinvatīḥ sapta jāmayah |  
 9.066.08c vipram ājā vivasvataḥ ||  
 9.066.09a mṛjanti tvā sam agruvo 'vye jīrāv adhi ṣvaṇi |  
 9.066.09c rebho yad ayyase vane ||  
 9.066.10a pavamānasya te kave vājīn sargā asṛkṣata |  
 9.066.10c arvanto na śravasyavaḥ ||  
 9.066.11a acchā kośam madhuścutam asṛgram vāre avyaye |  
 9.066.11c avāvaśanta dhītayaḥ ||  
 9.066.12a acchā samudram indavo 'staṁ gāvo na dhenavaḥ |  
 9.066.12c agmann ṛtasya yonim ā ||  
 9.066.13a pra ṇa indo mahe raṇa āpo arṣanti sindhavaḥ |  
 9.066.13c yad gobhir vāsaiṣyase ||  
 9.066.14a asya te sakhye vayam iyakṣantas tvotayaḥ |  
 9.066.14c indo sakhitvam uśmasi ||  
 9.066.15a ā pavasva gaviṣṭaye mahe soma nṛcakṣase |  
 9.066.15c endrasya jaṭhare viśa ||

9.066.16a mahāñ asi soma jyestha ugrāñam inda ojiṣṭhaḥ |  
 9.066.16c yudhvā sañ chaśvaj jigetha ||  
 9.066.17a ya ugrebhyaś cid ojīyāñ chūrebhyaś cic chūratarah |  
 9.066.17c bhūridābhyaś cin mamhīyān ||  
 9.066.18a tvañ soma sūra eṣas tokasya sātā tanūnām |  
 9.066.18c vṛñīmahe sakhyāya vṛñīmahe yujyāya ||  
 9.066.19a agna āyūñṣi pavasa ā suvorjam iṣam ca nah |  
 9.066.19c āre bādhasva ducchunām ||  
 9.066.20a agnir ṛṣiḥ pavamānaḥ pāñcajanyaḥ purohitaḥ |  
 9.066.20c tam īmahe mahāgayam ||  
 9.066.21a agne pavaśva svapā asme varcaḥ suvīryam |  
 9.066.21c dadhad rayim mayi poṣam ||  
 9.066.22a pavamāno ati sridho 'bhy arṣati suṣṭutim |  
 9.066.22c sūro na viśvadarśataḥ ||  
 9.066.23a sa marmṛjāna āyubhiḥ prayasvān prayase hitaḥ |  
 9.066.23c indur atyo vicakṣaṇaḥ ||  
 9.066.24a pavamāna ṛtam bṛhac chukrañ jyotir ajījanat |  
 9.066.24c kṛṣṇā tamāñsi jañghanat ||  
 9.066.25a pavamānasya jañghnato hareś candrā arṣkṣata |  
 9.066.25c jīrā ajiraśociṣaḥ ||  
 9.066.26a pavamāno rathītamaḥ śubhrebhiḥ śubhraśastamaḥ |  
 9.066.26c hariścandro marudgaṇaḥ ||  
 9.066.27a pavamāno vy aśnavad raśmibhir vājasātamaḥ |  
 9.066.27c dadhat stotre suvīryam ||  
 9.066.28a pra suvāna indur akṣāḥ pavitraḥ aty avyayam |  
 9.066.28c punāna indur indram ā ||  
 9.066.29a eṣa somo adhi tvaci gavāñ krīlaty adribhiḥ |  
 9.066.29c indram madāya johuvat ||  
 9.066.30a yasya te dyumnavat payaḥ pavamānābhṛtañ divaḥ |  
 9.066.30c tena no mṛḷa jīvase ||

9.067.01a tvañ somāsi dhārayur mandra ojiṣṭho adhvare |  
 9.067.01c pavaśva mamhayadrayiḥ ||  
 9.067.02a tvañ suto nṛmādano dadhanvān matsarintamaḥ |  
 9.067.02c indrāya sūrir andhasā ||  
 9.067.03a tvañ suśvāno adribhir abhy arṣa kanikradat |  
 9.067.03c dyumantañ śuśmam uttamam ||  
 9.067.04a indur hinvāno arṣati tiro vārāny avyayā |  
 9.067.04c harir vājam acikradat ||  
 9.067.05a indo vy avyam arṣasi vi śravāñsi vi saubhagā |  
 9.067.05c vi vājāñ soma gomataḥ ||  
 9.067.06a ā na indo śatagvinañ rayim gomantañ aśvinam |  
 9.067.06c bharā soma sahasriṇam ||  
 9.067.07a pavamānāsa indavas tiraḥ pavitraḥ āśavaḥ |  
 9.067.07c indrañ yāmebhir āśata ||  
 9.067.08a kakuhaḥ somyo rasa indur indrāya pūrvyaḥ |  
 9.067.08c āyuh pavata āyave ||  
 9.067.09a hinvanti sūram usrayaḥ pavamānam madhuścutam |  
 9.067.09c abhi girā sam asvaran ||  
 9.067.10a avitā no ajāśvaḥ pūṣā yāmani-yāmani |  
 9.067.10c ā bhakṣat kanyāsu nah ||  
 9.067.11a ayañ somaḥ kapardine ghṛtañ na pavate madhu |

- 9.067.11c ā bhakṣat kanyāsu naḥ ||  
9.067.12a ayaṁ ta āghrṇe suto ghr̥taṁ na pavate śuci |  
9.067.12c ā bhakṣat kanyāsu naḥ ||  
9.067.13a vāco jantuḥ kavīnām pavasva soma dhārayā |  
9.067.13c deveṣu ratnadhā asi ||  
9.067.14a ā kalaśeṣu dhāvati śyeno varma vi gāhate |  
9.067.14c abhi droṇā kanikradat ||  
9.067.15a pari pra soma te raso 'sarji kalaśe sutah |  
9.067.15c śyeno na takto arṣati ||  
9.067.16a pavasva soma mandayann indrāya madhumattamaḥ ||  
9.067.17a aṣṭgran devavītaye vājayanto rathā iva ||  
9.067.18a te sutāso madintamāḥ śukrā vāyum aṣṭkṣata ||  
9.067.19a grāvṇā tunno abhiṣṭutaḥ pavitraṁ soma gacchasi |  
9.067.19c dadhat stotre suvīryam ||  
9.067.20a eṣa tunno abhiṣṭutaḥ pavitraṁ ati gāhate |  
9.067.20c rakṣohā vāram avyayam ||  
9.067.21a yad anti yac ca dūrake bhayaṁ vindati mām iha |  
9.067.21c pavamāna vi taj jahi ||  
9.067.22a pavamānaḥ so adya naḥ pavitreṇa vicarṣaṇiḥ |  
9.067.22c yaḥ potā sa punātu naḥ ||  
9.067.23a yat te pavitraṁ arcisy agne vitatam antar ā |  
9.067.23c brahma tena punīhi naḥ ||  
9.067.24a yat te pavitraṁ arcivad agne tena punīhi naḥ |  
9.067.24c brahmasavaiḥ punīhi naḥ ||  
9.067.25a ubhābhyām deva savitaḥ pavitreṇa savena ca |  
9.067.25c mām punīhi viśvataḥ ||  
9.067.26a tribhiṣ tvaṁ deva savitar varṣiṣṭhaiḥ soma dhāmabhiḥ |  
9.067.26c agne dakṣaiḥ punīhi naḥ ||  
9.067.27a punantu mām devajanāḥ punantu vasavo dhiyā |  
9.067.27c viśve devāḥ punīta mā jātavedaḥ punīhi mā ||  
9.067.28a pra pyāyasva pra syandasva soma viśvebhir amśubhiḥ |  
9.067.28c devebhya uttamaṁ haviḥ ||  
9.067.29a upa priyam panipnataṁ yuvānam āhutīvṛdham |  
9.067.29c aganma bibhrato namaḥ ||  
9.067.30a alāyyasya paraśur nanāśa tam ā pavasva deva soma |  
9.067.30c ākhuṁ cid eva deva soma ||  
9.067.31a yaḥ pāvamānīr adhyety ṛṣibhiḥ sambhr̥taṁ rasam |  
9.067.31c sarvaṁ sa pūtam aśnāti svaditam mātariśvanā ||  
9.067.32a pāvamānīr yo adhyety ṛṣibhiḥ sambhr̥taṁ rasam |  
9.067.32c tasmai sarasvatī duhe kṣīraṁ sarpir madhūdakam ||
- 9.068.01a pra devam acchā madhumanta indavo 'siṣyadanta gāva ā na dhenavaḥ |  
9.068.01c barhiṣado vacanāvanta ūdhabhiḥ parisrutam usriyā nirṇijaṁ dhire ||  
9.068.02a sa roruvad abhi pūrvā acikradad upāruhaḥ śrathayan svādate hariḥ |  
9.068.02c tiraḥ pavitraṁ pariyan uru jrayo ni śaryāṇi dadhate deva ā varam ||  
9.068.03a vi yo mame yamyā saṁyatī madaḥ sākaṁvṛdhā payasā pinvad akṣitā |  
9.068.03c mahī apāre rajasī vivevidad abhivrajann akṣitam pāja ā dade ||  
9.068.04a sa mātārā vicaran vājayann apaḥ pra medhiraḥ svadhayā pinvate padam |  
9.068.04c amśur yavena pipiṣe yato nṛbhiḥ saṁ jāmbhir nasate rakṣate śiraḥ ||  
9.068.05a saṁ dakṣeṇa manasā jāyate kavir ṛtasya garbho nihito yamā paraḥ |  
9.068.05c yūnā ha santā prathamam vi jajñatur guhā hitam janima nemam udyatam ||  
9.068.06a mandrasya rūpaṁ vividur manīṣiṇaḥ śyeno yad andho abharat parāvataḥ |

9.068.06c tam marjayanta suvṛdham nadīṣv āṁ uśantam amśum pariyantam ṛgmiyam ||  
 9.068.07a tvām mṛjanti daśa yoṣaṇaḥ sutam soma ṛṣibhir matibhir dhītibhir hitam |  
 9.068.07c avyo vārebhir uta devahūtibhir nṛbhir yato vājam ā darṣi sātaye ||  
 9.068.08a pariprayantaṁ vayyaṁ suśamsadaṁ somam manīṣā abhy anūṣata stubhaḥ |  
 9.068.08c yo dhārayā madhumāṁ ūrmiṇā diva iyarti vācam rayiṣā| amartyaḥ ||  
 9.068.09a ayam diva iyarti viśvam ā rajaḥ somaḥ punānaḥ kalaśeṣu sīdati |  
 9.068.09c adbhir gobhir mṛjyate adribhiḥ sutaḥ punāna indur varivo vidat priyam ||  
 9.068.10a evā naḥ soma pariṣicyamāno vayo dadhac citratamam pavasva |  
 9.068.10c adveṣe dyāvāpṛthivī huvema devā dhatta rayim asme suvīram ||

9.069.01a iṣur na dhanvan prati dhīyate matir vatso na mātur upa sarjy ūdhani |  
 9.069.01c urudhāreva duhe agra āyaty asya vratesv apī soma iṣyate ||  
 9.069.02a upo matiḥ pṛcyate sicyate madhu mandrājanī codate antar āsani |  
 9.069.02c pavamānaḥ samtaniḥ praghnatām iva madhumān drapsaḥ pari vāram arṣati ||  
 9.069.03a avye vadhūyuh pavate pari tvaci śrathnīte naptīr adīter ṛtaṁ yate |  
 9.069.03c harir akrān yajataḥ samyato mado nrmṇā śiśāno mahiṣo na śobhate ||  
 9.069.04a ukṣā mimāti prati yanti dhenavo devasya devīr upa yanti niṣkṛtam |  
 9.069.04c aty akramīd arjunaṁ vāram avyayam atkaṁ na niktam pari somo avyata ||  
 9.069.05a amṛktena ruśatā vāsasā harir amartyo nirṇijānaḥ pari vyata |  
 9.069.05c divas pṛṣṭham barhaṇā nirṇije kṛtopastaraṇaṁ camvor nabhasmayam ||  
 9.069.06a sūryasyeva raśmayo drāvayitnavo matsarāsaḥ prasupaḥ sākam īrate |  
 9.069.06c tantum tatam pari sargāsa āśavo nendrad ṛte pavate dhāma kim cana ||  
 9.069.07a sindhor iva pravaṇe nimna āśavo vṛṣacyutā madāso gātum āśata |  
 9.069.07c śam no niveṣe dvipade catuṣpade 'sme vājāḥ soma tiṣṭhantu kṛṣṭayaḥ ||  
 9.069.08a ā naḥ pavasva vasumad dhiranyavad aśvāvad gomad yavamat suvīryam |  
 9.069.08c yūyam hi soma pitaro mama sthana divo mūrdhānaḥ prasthitā vayaskṛtaḥ ||  
 9.069.09a ete somāḥ pavamānāsa indraṁ rathā iva pra yayuh sātīm accha |  
 9.069.09c sutāḥ pavitram ati yanty avyaṁ hitvī vavriṁ harito vṛṣṭim accha ||  
 9.069.10a indav indrāya bṛhate pavasva sumṛṅko anavadyo riśādāḥ |  
 9.069.10c bharā candrāṇi gṛṇate vasūni devair dyāvāpṛthivī prāvataṁ naḥ ||

9.070.01a trir asmaī sapta dhenavo duduhre satyām āśiram pūrve vyomani |  
 9.070.01c catvāry anyā bhuvanāni nirṇije cārūṇi cakre yad ṛtair avardhata ||  
 9.070.02a sa bhikṣamāno amṛtasya cāruṇa ubhe dyāvā kāvyenā vi śāsrathe |  
 9.070.02c tejiṣṭhā apo mamhanā pari vyata yadī devasya śravasā sado viduh ||  
 9.070.03a te asya santu ketavo 'mṛtyavo 'dābhyāso januṣī ubhe anu |  
 9.070.03c yebhir nrmṇā ca devyā ca punata ād id rājānam mananā agrbhnata ||  
 9.070.04a sa mṛjyamāno daśabhiḥ sukarmabhiḥ pra madhyamāsu mātṛṣu prame sacā |  
 9.070.04c vratāni pāno amṛtasya cāruṇa ubhe nṛcakṣā anu paśyate viśau ||  
 9.070.05a sa marmṛjāna indriyāya dhāyasa obhe antā rodasī harṣate hitaḥ |  
 9.070.05c vṛṣā śuṣmeṇa bād hate vi durmatīr ādediśānaḥ śaryaheva śurudhaḥ ||  
 9.070.06a sa mātārā na dadṛśāna usriyo nānadad eti marutām iva svanaḥ |  
 9.070.06c jānann ṛtam prathamam yat svarṇaram praśastaye kam avṛṇīta sukratuḥ ||  
 9.070.07a ruvati bhīmo vṛṣabhas taviṣyayā śṛṅge śiśāno hariṇī vicakṣaṇaḥ |  
 9.070.07c ā yonim somaḥ sukṛtaṁ ni ṣīdati gavyayī tvag bhavati nirṇig avyayī ||  
 9.070.08a śuciḥ punānas tanvam arepasam avye harir ny adhāviṣṭa sānavi |  
 9.070.08c juṣṭo mitrāya varuṇāya vāyave tridhātu madhu kriyate sukarmabhiḥ ||  
 9.070.09a pavasva soma devavītaye vṛṣendrasya hārdi somadhānam ā viśa |  
 9.070.09c purā no bād hād durityāni pāraya kṣetravid dhi diśa āhā vipṛcchate ||  
 9.070.10a hito na saptir abhi vājam arṣendrasyendo jaṭharam ā pavasva |  
 9.070.10c nāvā na sindhum ati parṣi vidvāṅ chūro na yudhyann ava no nida spaḥ ||

9.071.01a ā dakṣiṇā srjyate śuśmy āsadam veti druho rakṣasaḥ pāti jāgr̥viḥ |  
 9.071.01c harir opaśam kṛṇute nabhas paya upastire camvor brahma nirṇije ||  
 9.071.02a pra kṛṣṭiḥeva śūṣa eti roruvad asuryam varṇam ni riṇīte asya tam |  
 9.071.02c jahāti vavrim pitur eti niṣkṛtam upaprutam kṛṇute nirṇijam tanā ||  
 9.071.03a adribhiḥ sutah pavate gabhastyor vṛṣāyate nabhasā vepate matī |  
 9.071.03c sa modate nasate sādgate girā nenikte apsu yajate parīmaṇi ||  
 9.071.04a pari dyukṣam sahasaḥ parvatāvṛdham madhvaḥ siṅcanti harmyasya sakṣaṇim |  
 9.071.04c ā yasmin gāvaḥ suhutāda ūdhani mūrdaḥ chrīṇanty agriyam varīmabhiḥ ||  
 9.071.05a sam ī ratham na bhurijor aheṣata daśa svasāro aditer upastha ā |  
 9.071.05c jigād upa jrayati gor apīcyam padaṁ yad asya matuthā ajījanan ||  
 9.071.06a śyeno na yonim sadanam dhiyā kṛtam hiraṇyayam āsadam deva eṣati |  
 9.071.06c e riṇanti barhiṣi priyam girāśvo na devām apy eti yajñiyah ||  
 9.071.07a parā vyakto aruṣo divaḥ kavir vṛṣā tripṛṣṭho anaviṣṭa gā abhi |  
 9.071.07c sahasraṇītir yatiḥ parāyati rebho na pūrvīr uṣaso vi rājati ||  
 9.071.08a tveṣam rūpaṁ kṛṇute varṇo asya sa yatrāśayat samṛtā sedhati sridhaḥ |  
 9.071.08c apsā yāti svadhayā daivyaṁ janam sam suṣṭutī nasate sam goagrayā ||  
 9.071.09a ukṣeva yūthā pariyan arāvīd adhi tviṣīr adhita sūryasya |  
 9.071.09c divyah suparṇo 'va cakṣata kṣām somaḥ pari kratunā paśyate jāḥ ||

9.072.01a harim mṛjanty aruṣo na yujyate sam dhenubhiḥ kalaśe somo ajyate |  
 9.072.01c ud vācam īrayati hinvate matī puruṣtutasya kati cit paripriyah ||  
 9.072.02a sākaṁ vadanti bahavo manīṣiṇa indrasya somaṁ jāṭhare yad āduhuḥ |  
 9.072.02c yadī mṛjanti sugabhastayo naraḥ sanīlābhir daśabhiḥ kāmyam madhu ||  
 9.072.03a aramamāṇo aty eti gā abhi sūryasya priyam duhitus tiro ravam |  
 9.072.03c anv asmai joṣam abharad vīnamgrsaḥ sam dvayībhiḥ svasr̥bhiḥ kṣeti jāmbhiḥ ||  
 9.072.04a nṛdhūto adriṣuto barhiṣi priyah patir gavām pradiva indur rtviyah |  
 9.072.04c puramdhipān manuṣo yajñasādhanah śucir dhiyā pavate soma indra te ||  
 9.072.05a nṛbāhubhyām codito dhārayā suto 'nuśvadam pavate soma indra te |  
 9.072.05c āprāḥ kratūn sam ajair adhvare matīr ver na druṣac camvor āsadam dhariḥ ||  
 9.072.06a amśum duhanti stanayantam akṣitam kavim kavayo 'paso manīṣiṇah |  
 9.072.06c sam ī gāvo matayo yanti samyata ṛtasya yonā sadane punarbhuvaḥ ||  
 9.072.07a nābhā pṛthivyā dharuṇo maho divo 'pām ūrmau sindhuṣv antar ukṣitah |  
 9.072.07c indrasya vajro vṛṣabho vibhūvasuḥ somo hr̥de pavate cāru matsarah ||  
 9.072.08a sa tū pavasva pari pāthivam raja stotre śikṣann ādhūnvate ca sukrato |  
 9.072.08c mā no nir bhāg vasunaḥ sādanaspr̥so rayim piśaṅgam bahulam vasīmahi ||  
 9.072.09a ā tū na indo śatadāt v aśvyam sahasradātu paśumad dhiranyavat |  
 9.072.09c upa māsva bṛhatī revatīr iṣo 'dhi stotrasya pavamāna no gahi ||

9.073.01a srakve drapsasya dhamataḥ sam asvarann ṛtasya yonā sam aranta nābhayah |  
 9.073.01c trīn sa mūrhdno asuraś cakra ārabhe satyasya nāvaḥ sukṛtam apīparan ||  
 9.073.02a samyak samyaṅco mahiṣā aheṣata sindhor ūrmāv adhi venā avīvipan |  
 9.073.02c madhor dhārābhir janayanto arkam it priyam indrasya tanvam avīvṛdhan ||  
 9.073.03a pavitravantah pari vācam āsate pitaiśam pratno abhi rakṣati vratam |  
 9.073.03c mahah samudram varuṇas tiro dadhe dhīrā ic chekur dharuṇeṣv ārabham ||  
 9.073.04a sahasradhāre 'va te sam asvaran divo nāke madhujihvā asaścataḥ |  
 9.073.04c asya spaśo na ni miṣanti bhūrṇayah pade-pade pāśinah santi setavaḥ ||  
 9.073.05a pitur mātur adhy ā ye samasvarann ṛcā śocantah samdahanto avratān |  
 9.073.05c indradviṣṭam apa dhamanti māyayā tvacam asiknīm bhūmano divas pari ||  
 9.073.06a pratnān mādād adhy ā ye samasvaraṇ chlokayantrāso rabhasasya mantavaḥ |  
 9.073.06c apānakṣāso badhirā ahāsata ṛtasya panthām na taranti duṣkṛtah ||  
 9.073.07a sahasradhāre vitate pavitra ā vācam punanti kavayo manīṣiṇah |  
 9.073.07c rudrāsa eṣām iṣirāso adruha spaśah svañcaḥ sudṛśo nṛcakṣasaḥ ||

9.073.08a ṛtasya gopā na dabhāya sukṛatus trī ṣa pavitrā hṛdy antar ā dadhe |  
9.073.08c vidvān sa viśvā bhuvanābhi paśyaty avājuṣṭān vidhyati karte avratān ||  
9.073.09a ṛtasya tantur vitataḥ pavitra ā jihvāyā agre varuṇasya māyayā |  
9.073.09c dhīrās cit tat saminakṣanta āsatātrā kartam ava padāty aprabhuḥ ||

9.074.01a śiśur na jāto 'va cakradad vane svar yad vājy aruṣaḥ siṣāsati |  
9.074.01c divo retasā sacate payovrdhā tam īmahe sumatī śarma saprathaḥ ||  
9.074.02a divo ya skambho dharuṇaḥ svātata āpūrṇo amśuḥ paryeti viśvataḥ |  
9.074.02c seme mahī rodasī yakṣad āvṛtā samīcīne dādhāra sam iṣaḥ kaviḥ ||  
9.074.03a mahi psaraḥ sukṛtaṁ somyam madhūrvī gavyūtir aditer ṛtaṁ yate |  
9.074.03c īse yo vṛṣṭer ita usriyo vṛṣāpām netā ya itaūtir ṛgmiyaḥ ||  
9.074.04a ātmanvan nabho duhyate ghr̥tam paya ṛtasya nābhir amṛtaṁ vi jāyate |  
9.074.04c samīcīnāḥ sudānavaḥ prīṇanti taṁ naro hitam ava mehanti peravaḥ ||  
9.074.05a arāvīd amśuḥ sacamāna ūrminā devāvyam manuṣe pinvati tvacam |  
9.074.05c dadhāti garbham aditer upastha ā yena tokaṁ ca tanayaṁ ca dhāmahe ||  
9.074.06a sahasradhāre 'va tā asaścatas tṛtīye santu rajasi prajāvatīḥ |  
9.074.06c catasro nābho nihitā avo divo havir bharanty amṛtaṁ ghr̥taścutaḥ ||  
9.074.07a śvetaṁ rūpaṁ kṛṇute yat siṣāsati somo mīdhvāṁ asuro veda bhūmanaḥ |  
9.074.07c dhiyā śamī sacate sem abhi pravada divas kavandham ava darṣad udriṇam ||  
9.074.08a adha śvetaṁ kalaśaṁ gobhir aktaṁ kārṣmann ā vājy akramīt sasavān |  
9.074.08c ā hinvire manasā devayantaḥ kakṣīvate śatahimāya gonām ||  
9.074.09a adbhīḥ soma papṛcānasya te raso 'vyo vāraṁ vi pavamāna dhāvati |  
9.074.09c sa mṛjyamānaḥ kavibhir madintama svadasvendrāya pavamāna pītaye ||

9.075.01a abhi priyāṇi pavate canohito nāmāni yahvo adhi yeṣu vardhate |  
9.075.01c ā sūryasya br̥hato br̥hann adhi rathaṁ viśvañcam aruhad vicakṣaṇaḥ ||  
9.075.02a ṛtasya jihvā pavate madhu priyaṁ vaktā patir dhiyo asyā adābhyah |  
9.075.02c dadhāti putraḥ pitror apīcyam nāma tṛtīyam adhi rocane divaḥ ||  
9.075.03a ava dyutānaḥ kalaśāṁ acikradan nṛbhir yemānaḥ kośa ā hiranyaye |  
9.075.03c abhīm ṛtasya dohanā anūsatādhi tripṛṣṭha uśaso vi rājati ||  
9.075.04a adribhiḥ suto matibhiś canohitaḥ prarocayan rodasī mātara śuciḥ |  
9.075.04c romāṇy avyā samayā vi dhāvati madhor dhārā pinvamānā dive-dive ||  
9.075.05a pari soma pra dhanvā svastaye nṛbhiḥ punāno abhi vāsyaśīram |  
9.075.05c ye te madā āhanaso vihāyayas tebhir indraṁ codaya dātave magham ||

9.076.01a dhartā divaḥ pavate kṛtvyo raso dakṣo devānām anumādyo nṛbhiḥ |  
9.076.01c hariḥ sr̥jāno atyo na satvabhir vṛthā pājāmsi kṛṇute nadīṣv ā ||  
9.076.02a sūro na dhata āyudhā gabhastyoḥ svaḥ siṣāsan rathiro gaviṣṭiṣu |  
9.076.02c indrasya śuṣmam īrayann apasyubhir indur hinvāno ajyate maṇīṣibhiḥ ||  
9.076.03a indrasya soma pavamāna ūrminā taviṣyamāṇo jaṭhareṣv ā viśa |  
9.076.03c pra naḥ pinva vidyud abhrevā rodasī dhiyā na vājāṁ upa māsi śaśvataḥ ||  
9.076.04a viśvasya rājā pavate swardṛśa ṛtasya dhītim ṛṣiṣā avīvaśat |  
9.076.04c yaḥ sūryasyāsireṇa mṛjyate pitā matīnām asamaṣṭakāvyah ||  
9.076.05a vṛṣeva yūthā pari kośam arṣasy apām upasthe vṛṣabhaḥ kanikradat |  
9.076.05c sa indrāya pavase matsarintamo yathā jeṣāma samithe tvotayaḥ ||

9.077.01a eṣa pra kośe madhumāṁ acikradad indrasya vajro vapuṣo vapuṣṭaraḥ |  
9.077.01c abhīm ṛtasya sudughā ghr̥taścuta vāsrā arṣanti payaseva dhenavaḥ ||  
9.077.02a sa pūrvyaḥ pavate yaṁ divas pari śyeno mathāyad iṣitas tiro rajaḥ |  
9.077.02c sa madhva ā yuvate vevijāna it kṛṣānor astur manasāha bibhyuṣā ||  
9.077.03a te naḥ pūrvāsa uparāsa indavo mahe vājāya dhanvantu gomate |  
9.077.03c īkṣeṇyāso ahyo na cāravo brahma-brahma ye jujuṣur havir-haviḥ ||

9.077.04a ayam no vidvān vanavad vanuṣyata induḥ satrācā manasā puruṣtutaḥ |  
9.077.04c inasya yaḥ sadane garbham ādadhe gavām urubjam abhy arṣati vrajam ||  
9.077.05a cakrir divaḥ pavate kṛtvyo raso mahāṃ adabdho varuṇo hurug yate |  
9.077.05c asāvi mitro vṛjaneṣu yajñiyo 'tyo na yūthe vṛṣayuḥ kanikradat ||

9.078.01a pra rājā vācam janayann asiṣyadad apo vasāno abhi gā iyakṣati |  
9.078.01c ḡrbhñāti ripram avir asya tānvā śuddho devānām upa yāti niṣkṛtam ||  
9.078.02a indrāya soma pari ṣicyase nṛbhir nṛcakṣā ūrmiḥ kavir ajyase vane |  
9.078.02c pūrvīr hi te srutayaḥ santi yātave sahasram aśvā harayaś camūśadaḥ ||  
9.078.03a samudriyā apsaraso manīṣiṇam āsīnā antar abhi somam akṣaran |  
9.078.03c tā īm hinvanti harmyasya sakṣaṇim yācante sumnam pavamānam akṣitam ||  
9.078.04a gojin naḥ somo rathajid dhiranyaḥ svarjid abjit pavate sahasrajit |  
9.078.04c yaṃ devāśaś cakrire pītaye madam svādiṣṭham drapsam aruṇam mayobhuvam ||  
9.078.05a etāni soma pavamāno asmayuḥ satyāni kṛṇvan draviṇāny arṣasi |  
9.078.05c jahi śatrum antike dūrake ca ya urvīm gavyūtim abhayaṃ ca nas kṛdhi ||

9.079.01a acodaso no dhanvantv indavaḥ pra suvānāso bṛhaddiveṣu harayaḥ |  
9.079.01c vi ca naśan na iṣo arātayo 'ryo naśanta saniśanta no dhiyaḥ ||  
9.079.02a pra ṇo dhanvantv indavo madacyuto dhanā vā yebhir arvato junīmasi |  
9.079.02c tiro martasya kasya cit parihvṛtim vayan dhanāni viśvadhā bharemahi ||  
9.079.03a uta svasyā arātyā arir hi ṣa utānyasyā arātyā vṛko hi ṣaḥ |  
9.079.03c dhanvan na tṛṣṇā sam arīta tāṃ abhi soma jahi pavamāna durādhyah ||  
9.079.04a divi te nābhā paramo ya ādade pṛthivyās te ruruhuḥ sānavi kṣipah |  
9.079.04c adrayas tvā bapsati gor adhi tvacy apsu tvā hastair duduhur manīṣiṇah ||  
9.079.05a evā ta indo subhvaṃ supeśasaṃ rasaṃ tuñjanti prathamā abhiśriyaḥ |  
9.079.05c nidam-nidam pavamāna ni tāriṣa āvis te śuṣmo bhavatu priyo madaḥ ||

9.080.01a somasya dhārā pavate nṛcakṣasa ṛtena devān havate divas pari |  
9.080.01c bṛhaspate ravathenā vi didyute samudrāso na savanāni vivyacuḥ ||  
9.080.02a yaṃ tvā vājinn aghnyā abhy anūśatāyohataṃ yonim ā rohasi dyumān |  
9.080.02c maghonām āyuh pratiran mahi śrava indrāya soma pavase vṛṣā madaḥ ||  
9.080.03a endrasya kukṣā pavate madintama ūrjam vasānaḥ śravase sumaṅgalaḥ |  
9.080.03c pratyaṃ sa viśvā bhuvanābhi paprathe kṛīlan harir atyaḥ syandate vṛṣā ||  
9.080.04a taṃ tvā devebhyo madhumattamaṃ naraḥ sahasradhāraṃ duhate daśa kṣipah |  
9.080.04c nṛbhiḥ soma pracyuto grāvabhiḥ suto viśvān devāṃ ā pavasvā sahasrajit ||  
9.080.05a taṃ tvā hastino madhumantam adribhir duhanty apsu vṛṣabham daśa kṣipah |  
9.080.05c indraṃ soma mādayan daivyaṃ janam sindhor ivormiḥ pavamāno arṣasi ||

9.081.01a pra somasya pavamānasyormaya indrasya yanti jaṭharam supeśasaḥ |  
9.081.01c dadhnā yad īm unnītā yaśasā gavām dānāya śūram udamandiṣuḥ sutāḥ ||  
9.081.02a acchā hi somaḥ kalaśāṃ asiṣyadad atyo na volhā raghuvartanir vṛṣā |  
9.081.02c athā devānām ubhayasya janmano vidvāṃ aśnoty amuta itaś ca yat ||  
9.081.03a ā naḥ soma pavamānaḥ kirā vasv indo bhava maghavā rādhaso mahah |  
9.081.03c śikṣā vayodho vasave su cetunā mā no gayam āre asmat parā sicah ||  
9.081.04a ā naḥ pūṣā pavamānaḥ surātayo mitro gacchantu varuṇaḥ sajośasaḥ |  
9.081.04c bṛhaspatir maruto vāyur aśvinā tvaṣṭā savitā suyamā sarasvatī ||  
9.081.05a ubhe dyāvāpṛthivī viśvaminve aryamā devo aditir vidhātā |  
9.081.05c bhago nṛśamsa urv antarikṣam viśve devāḥ pavamānam juṣanta ||

9.082.01a asāvi somo aruṣo vṛṣā harī rājeva dasmo abhi gā acikradat |  
9.082.01c punāno vāram pary ety avyayaṃ śyeno na yonim ḡhṛtavantam āsadam ||  
9.082.02a kavir vedhasyā pary eṣi māhinam atyo na mṛṣṭo abhi vājam arṣasi |

9.082.02c apasedhan duritā soma mṛḷaya ghr̥tam vasānaḥ pari yāsi nirṇijam ||  
 9.082.03a parjanyaḥ pitā mahiṣasya parṇino nābhā pṛthivyā giriṣu kṣayaṁ dadhe |  
 9.082.03c svasāra āpo abhi gā utāsaran sam grāvabhir nasate vīte adhvare ||  
 9.082.04a jāyeva patyāv adhi śeva mamhase pajrāyā garbha śṛṇuhi bravīmi te |  
 9.082.04c antar vāṇiṣu pra carā su jīvase 'nindyo vṛjane soma jāgr̥hi ||  
 9.082.05a yathā pūrvebhyaḥ śatasā amṛdhraḥ sahasrasāḥ paryayā vājam indo |  
 9.082.05c evā pavasva suvitāya navyase tava vratam anv āpaḥ sacante ||

9.083.01a pavitraṁ te vitatam brahmaṇas pate prabhur gātrāṇi pary eṣi viśvataḥ |  
 9.083.01c ataptatanūr na tad āmo aśnute śṛtāsa id vahantas tat sam āśata ||  
 9.083.02a tapoṣ pavitraṁ vitatāṁ divas pade śocanto asya tantavo vy asthiraṇ |  
 9.083.02c avanty asya pavītāram āśavo divas pṛṣṭham adhi tiṣṭhanti cetasā ||  
 9.083.03a arūrucad uṣasaḥ pṛṣṇir agriya ukṣā bibharti bhuvanāni vājayuh |  
 9.083.03c māyāvino mamire asya māyayā nṛcaksasaḥ pitaro garbham ā dadhuḥ ||  
 9.083.04a gandharva itthā padam asya rakṣati pāti devānām janimāny adbhutaḥ |  
 9.083.04c gr̥bhṇāti ripuṁ nidhayā nidhāpatih sukṛttamā madhuno bhakṣam āśata ||  
 9.083.05a havir haviṣmo mahi sadma daivyaṁ nabho vasānaḥ pari yāsy adhvaram |  
 9.083.05c rājā pavitraratho vājam āruhaḥ sahasrabhr̥ṣṭir jayasi śravo bṛhat ||

9.084.01a pavasva devamādano vicarṣaṇir apsā indrāya varuṇāya vāyave |  
 9.084.01c kṛdhī no adya varivaḥ svastimad urukṣitau gr̥ṇīhi daivyaṁ janam ||  
 9.084.02a ā yas tasthau bhuvanāny amartyo viśvāni somaḥ pari tāny arṣati |  
 9.084.02c kṛṇvan samer̥tam vicṛtam abhiṣṭaya induḥ siṣakty uṣasaṁ na sūryaḥ ||  
 9.084.03a ā yo gobhiḥ sr̥jyata oṣadhīṣv ā devānām sumna iṣayann upāvasuh |  
 9.084.03c ā vidyutā pavate dhārayā suta indraṁ somo mādayan daivyaṁ janam ||  
 9.084.04a eṣa sya somaḥ pavate sahasrajid dhinvāno vācam iṣirām uṣarbudham |  
 9.084.04c induḥ samudram ud iyarti vāyubhir endrasya hārdi kalaśeṣu sīdati ||  
 9.084.05a abhi tyam gāvah payasā payovṛdham somaṁ śrīṇanti matibhiḥ svarvidam |  
 9.084.05c dhanam̐jayaḥ pavate kṛtvyo raso vipraḥ kaviḥ kāvyenā svarcanāḥ ||

9.085.01a indrāya soma suṣutaḥ pari sravāpāmīvā bhavatu rakṣasā saha |  
 9.085.01c mā te rasasya matsata dvayāvino draviṇasvanta iha santv indavaḥ ||  
 9.085.02a asmān samarye pavamāna codaya dakṣo devānām asi hi priyo madaḥ |  
 9.085.02c jahi śatrūṁr abhy ā bhandanāyataḥ pibendra somam ava no mṛdho jahi ||  
 9.085.03a adabdha indo pavase madintama ātmendrasya bhavasi dhāsir uttamaḥ |  
 9.085.03c abhi svaranti bahavo manīṣiṇo rājānam asya bhuvanasya nimsate ||  
 9.085.04a sahasraṇīthaḥ śatadhāro adbhuta indrāyenduh pavate kāmyam madhu |  
 9.085.04c jayan kṣetram abhy arṣā jayann apa uruṁ no gātuṁ kṛṇu soma mīdhvah ||  
 9.085.05a kanikradat kalaśe gobhir alyase vy avyayaṁ samayā vāram arṣasi |  
 9.085.05c marmṛjyamāno atyo na sānasir indrasya soma jaṭhare sam akṣaraḥ ||  
 9.085.06a svāduḥ pavasva divyāya janmane svādur indrāya suhavītunāmne |  
 9.085.06c svādur mitrāya varuṇāya vāyave bṛhaspataye madhumām̐ adābhyah ||  
 9.085.07a atyam mṛjanti kalaśe daśa kṣipaḥ pra viprāṇām matayo vāca īrate |  
 9.085.07c pavamānā abhy arṣanti suṣṭutim endraṁ viśanti madirāsa indavaḥ ||  
 9.085.08a pavamāno abhy arṣā suvīryam urvīm gavyūtīm mahi śarma saprathaḥ |  
 9.085.08c mākir no asya pariṣūtir īśatendo jayema tvayā dhanam̐-dhanam ||  
 9.085.09a adhi dyām asthād vṛṣabho vicakṣaṇo 'rūrucad vi divo rocanā kaviḥ |  
 9.085.09c rājā pavitraṁ aty eti roruvad divaḥ pīyūṣam duhate nṛcaksasaḥ ||  
 9.085.10a divo nāke madhujihvā asaścato venā duhanty ukṣaṇam̐ giriṣṭhām |  
 9.085.10c apsu drapsam̐ vāvṛdhānam̐ samudra ā sindhor ūrmā madhumantam pavitra ā ||  
 9.085.11a nāke suparṇam̐ upapaptivāmsam̐ giro venānām̐ akṛpanta pūrvīḥ |  
 9.085.11c śīsum̐ rihanti matayaḥ panipnataṁ hiraṇyayaṁ śakunaṁ kṣāmaṇi sthām̐ ||

9.085.12a ūrdhvo gandharvo adhi nāke asthād viśvā rūpā praticakṣāṇo asya |  
9.085.12c bhānuḥ śukreṇa śociṣā vy adyaut prārūrucad rodasī mātārā śuciḥ ||

9.086.01a pra ta āśavaḥ pavamāna dhījavo madā arṣanti raghujā iva tmanā |  
9.086.01c divyāḥ suparṇā madhumanta indavo madintamāsaḥ pari kośam āsate ||  
9.086.02a pra te madāso madirāsa āśavo 'srkṣata rathyāso yathā pṛthak |  
9.086.02c dhenur na vatsam payasābhi vajriṇam indram indavo madhumanta ūrmayah ||  
9.086.03a atyo na hiyāno abhi vājam arṣa svarvit kośam divo adrimātaram |  
9.086.03c vṛṣā pavitre adhi sāno avyaye somaḥ punāna indriyāya dhāyase ||  
9.086.04a pra ta āśvinīḥ pavamāna dhījuvo divyā asṛgran payasā dharīmani |  
9.086.04c prāntar ṛṣaya sthāvīrīr asṛkṣata ye tvā mṛjanty ṛṣiṣāna vedhasaḥ ||  
9.086.05a viśvā dhāmāni viśvacakṣa ṛbhvasaḥ prabhos te sataḥ pari yanti ketavaḥ |  
9.086.05c vyānaśiḥ pavase soma dharmabhiḥ patir viśvasya bhuvanasya rājasi ||  
9.086.06a ubhayataḥ pavamānasya rāsmayo dhruvasya sataḥ pari yanti ketavaḥ |  
9.086.06c yadī pavitre adhi mṛjyate hariḥ sattā ni yonā kalaśeṣu sīdati ||  
9.086.07a yajñasya ketuḥ pavate svadhvaraḥ somo devānām upa yāti niṣkṛtam |  
9.086.07c sahasradhāraḥ pari kośam arṣati vṛṣā pavitram aty eti roruvat ||  
9.086.08a rājā samudram nadyo vi gāhate 'pām ūrmiṃ sacate sindhuṣu śritaḥ |  
9.086.08c adhy asthāt sānu pavamāno avyayam nābhā pṛthivyā dharuṇo maho divaḥ ||  
9.086.09a divo na sānu stanayann acikradad dyaus ca yasya pṛthivī ca dharmabhiḥ |  
9.086.09c indrasya sakhyam pavate vivevidat somaḥ punānaḥ kalaśeṣu sīdati ||  
9.086.10a jyotir yajñasya pavate madhu priyam pitā devānām janitā vibhūvasuḥ |  
9.086.10c dadhāti ratnam svadhayor apīcyam madintamo matsara indriyo rasaḥ ||  
9.086.11a abhikrandan kalaśam vājy arṣati patir divaḥ śatadhāro vicakṣaṇaḥ |  
9.086.11c harir mitrasya sadaneṣu sīdati marmṛjāno 'vibhiḥ sindhubhir vṛṣā ||  
9.086.12a agre sindhūnām pavamāno arṣaty agre vāco agriyo goṣu gacchati |  
9.086.12c agre vājasya bhajate mahādhanam svāyudhaḥ sotṛbhiḥ pūyate vṛṣā ||  
9.086.13a ayam matavān chakuno yathā hito 'vye sasāra pavamāna ūrmiṇā |  
9.086.13c tava kratvā rodasī antarā kave śucir dhiyā pavate soma indra te ||  
9.086.14a drāpiṃ vasāno yajato diviṣṛṣam antarikṣaprā bhuvaneṣv arpitaḥ |  
9.086.14c svar jajñāno nabhasābhy akramīt pratnam asya pītaram ā vivāsati ||  
9.086.15a so asya viśe mahi śarma yacchati yo asya dhāma prathamam vyānaśe |  
9.086.15c padaṃ yad asya parame vyomany ato viśvā abhi sam yāti samyataḥ ||  
9.086.16a pro ayāsīd indur indrasya niṣkṛtam sakhā sakhyur na pra mināti samgiram |  
9.086.16c marya iva yuvatibhiḥ sam arṣati somaḥ kalaśe śatayāmnā pathā ||  
9.086.17a pra vo dhiyo mandrayuvo vipanyuvaḥ panasyuvaḥ samvasaneṣv akramuḥ |  
9.086.17c somam manīṣā abhy anūṣata stubho 'bhi dhenavaḥ payasem aśīśrayuḥ ||  
9.086.18a ā naḥ soma samyatam pipyuṣīm iṣam indo pavasva pavamāno asridham |  
9.086.18c yā no dohate trir ahann asaścuṣī kṣumad vājavan madhumat suvīryam ||  
9.086.19a vṛṣā matīnām pavate vicakṣaṇaḥ somo ahnaḥ pratarītoṣaso divaḥ |  
9.086.19c krāṇā sindhūnām kalaśāṃ avīvaśad indrasya hārdy āviśan manīṣibhiḥ ||  
9.086.20a manīṣibhiḥ pavate pūrvaḥ kavir nṛbhir yataḥ pari kośam acikradat |  
9.086.20c tritasya nāma janayan madhu kṣarad indrasya vāyoḥ sakhyāya kartave ||  
9.086.21a ayam punāna uṣaso vi rocayad ayam sindhubhyo abhavad u lokakṛt |  
9.086.21c ayam triḥ sapta duduhāna āśiram somo hṛde pavate cāru matsaraḥ ||  
9.086.22a pavasva soma divyeṣu dhāmasu sṛjāna indo kalaśe pavitra ā |  
9.086.22c sīdann indrasya jāthare kanikradan nṛbhir yataḥ sūryam ārohayo divi ||  
9.086.23a adribhiḥ sutaḥ pavase pavitra āṃ indav indrasya jāthareṣv āviśan |  
9.086.23c tvam nṛcakṣā abhavo vicakṣaṇa soma gotram aṅgirobhyo 'vṛṇor apa ||  
9.086.24a tvām soma pavamānam svādhyo 'nu viprāso amadann avasyavaḥ |  
9.086.24c tvām suparṇa ābharad divas parīndo viśvābhir matibhiḥ pariṣkṛtam ||  
9.086.25a avye punānam pari vāra ūrmiṇā hariṃ navante abhi sapta dhenavaḥ |

- 9.086.25c apām upasthe adhy āyavaḥ kavim ṛtasya yonā mahiṣā aheṣata ||  
9.086.26a induḥ punāno ati gāhate mṛdho viśvāni kṛṇvan supathāni yajyave |  
9.086.26c gāḥ kṛṇvāno nirṇijam haryataḥ kavir atyo na krīlan pari vāram arṣati ||  
9.086.27a asaścataḥ śatadhārā abhiśriyo harim navante 'va tā udanyuvaḥ |  
9.086.27c kṣipo mṛjanti pari gobhir āvṛtaḥ ṛṭīye pṛṣṭhe adhi rocane divaḥ ||  
9.086.28a tavemāḥ prajā divyasya retasas tvam viśvasya bhuvanasya rājasi |  
9.086.28c athedaḥ viśvam pavamāna te vaṣe tvam indo prathamo dhāmadhā asi ||  
9.086.29a tvam samudro asi viśvavit kave tavemāḥ pañca pradiśo vidharmaṇi |  
9.086.29c tvam dyām ca pṛthivīm cāti jabhriṣe tava jyotīmṣi pavamāna sūryaḥ ||  
9.086.30a tvam pavitre rajaso vidharmaṇi devebhyaḥ soma pavamāna pūyase |  
9.086.30c tvām uśijaḥ prathamā agr̥bhṇata tubhyemā viśvā bhuvanāni yemire ||  
9.086.31a pra rebha ety ati vāram avyayaḥ vṛṣā vaneṣv ava cakradad dhariḥ |  
9.086.31c sam dhītayo vāvaśānā anūṣata śiśum rihanti matayaḥ panipnatam ||  
9.086.32a sa sūryasya raśmibhiḥ pari vyata tantum tanvānas trivṛtaḥ yathā vide |  
9.086.32c nayann ṛtasya praśiṣo navīyasīḥ patir janīnām upa yāti niṣkṛtam ||  
9.086.33a rājā sindhūnām pavate patir diva ṛtasya yāti pathibhiḥ kanikradat |  
9.086.33c sahasradhāraḥ pari śicyate hariḥ punāno vācam janayann upāvasuḥ ||  
9.086.34a pavamāna mahy arṇo vi dhāvasi sūro na citro avyayāni pavyayā |  
9.086.34c gabhastipūto nṛbhir adribhiḥ suto mahe vājāya dhanyāya dhanvasi ||  
9.086.35a iṣam ūrjam pavamānābhy arṣasi śyeno na vaṁsu kalaśeṣu sīdasi |  
9.086.35c indrāya madvā madyo madaḥ suto divo viṣṭambha upamo vicakṣaṇaḥ ||  
9.086.36a sapta svasāro abhi mātaraḥ śiśum navam jajñānam jenyam vipaścitam |  
9.086.36c apām gandharvaḥ divyaḥ nṛcakṣasam somam viśvasya bhuvanasya rājase ||  
9.086.37a iśāna imā bhuvanāni vīyase yujāna indo haritaḥ suparṇyaḥ |  
9.086.37c tās te kṣarantu madhumad ghṛtam payas tava vrata soma tiṣṭhantu kṛṣṭayaḥ ||  
9.086.38a tvam nṛcakṣā asi soma viśvataḥ pavamāna vṛṣabha tā vi dhāvasi |  
9.086.38c sa naḥ pavaṣva vasumad dhiraṇyavad vyaḥ syāma bhuvaneṣu jīvase ||  
9.086.39a govit pavaṣva vasuvid dhiraṇyavid retodhā indo bhuvaneṣv arpitaḥ |  
9.086.39c tvam suvīro asi soma viśvavit tam tvā viprā upa girema āsate ||  
9.086.40a un madhva ūrmir vananā atiṣṭhipad apo vasāno mahiṣo vi gāhate |  
9.086.40c rājā pavitraratho vājam āruhat sahasrabhṛṣṭir jayati śravo bṛhat ||  
9.086.41a sa bhandanā ud iyarti prajāvatīr viśvāyur viśvāḥ subharā ahardivi |  
9.086.41c brahma prajāvad rayim aśvapastyam pīta indav indram asmabhyam yācatāt ||  
9.086.42a so agre ahnām harir haryato madaḥ pra cetasa cetayate anu dyubhiḥ |  
9.086.42c dvā janā yātayann antar īyate narā ca śamsam daivyaḥ ca dhartari ||  
9.086.43a añjate vy añjate sam añjate kratum rihanti madhunābhy añjate |  
9.086.43c sindhor ucchvāse patayantam ukṣaṇam hiraṇyapāvāḥ paśum āsu gr̥bhṇate ||  
9.086.44a vipaścite pavamānāya gāyata mahī na dhārāty andho arṣati |  
9.086.44c ahir na jūrṇām ati sarpati tvacam atyo na krīlann asarad vṛṣā hariḥ ||  
9.086.45a agrego rājāpyas taviṣyate vimāno ahnām bhuvaneṣv arpitaḥ |  
9.086.45c harir ghṛtasnuḥ sudṛśīko arṇavo jyotīrathaḥ pavate rāya okyaḥ ||  
9.086.46a asarji skambho diva udyato madaḥ pari tridhātur bhuvanāny arṣati |  
9.086.46c amśum rihanti matayaḥ panipnataḥ girā yadi nirṇijam rgmiṇo yayuḥ ||  
9.086.47a pra te dhārā aty añvāni meṣyaḥ punānasya samyato yanti ramhayaḥ |  
9.086.47c yad gobhir indo camvoḥ samajyasa ā suvānaḥ soma kalaśeṣu sīdasi ||  
9.086.48a pavaṣva soma kratuvin na ukthyo 'vyo vāre pari dhāva madhu priyam |  
9.086.48c jahi viśvān rakṣasa indo atriṇo bṛhad vadema vidathe suvīrāḥ ||
- 9.087.01a pra tu drava pari kośam ni śīda nṛbhiḥ punāno abhi vājam arṣa |  
9.087.01c aśvam na tvā vājinam marjayanto 'cchā barhī raśanābhir nayanti ||  
9.087.02a svāyudhaḥ pavate deva indur aśastihā vṛjanaḥ rakṣamāṇaḥ |  
9.087.02c pitā devānām janitā sudakṣo viṣṭambho divo dharuṇaḥ pṛthivyāḥ ||

9.087.03a r̥ṣir vipraḥ puraetā janānām ṛbhur dhīra uśanā kāvyena |  
 9.087.03c sa cid viveda nihitam yad āsām apīcyam guhyam nāma gonam ||  
 9.087.04a eṣa sya te madhumām̃ indra somo vṛṣā vṛṣṇe pari pavitre akṣāḥ |  
 9.087.04c sahasrasāḥ śatasā bhūridāvā śasvattamam barhir ā vājy asthāt ||  
 9.087.05a ete somā abhi gavyā sahasrā mahe vājyāmṛtāya śravāmsi |  
 9.087.05c pavitrebhiḥ pavamānā asṛgraḥ chravasyavo na pṛtanājo atyāḥ ||  
 9.087.06a pari hi śmā puruhūto janānām viśvāsarad bhojanā pūyamānaḥ |  
 9.087.06c athā bhara śyenabhṛta prayāmsi rayim tuñjāno abhi vājam arṣa ||  
 9.087.07a eṣa suvānaḥ pari somaḥ pavitre sargo na sṛṣto adadhāvad arvā |  
 9.087.07c tigme śiśāno mahiṣo na śṛṅge gā gavyann abhi sūro na satvā ||  
 9.087.08a eṣā yayau paramād antar adreḥ kūcit satīr ūrve gā viveda |  
 9.087.08c divo na vidyut stanayanty abhraiḥ somasya te pavata indra dhārā ||  
 9.087.09a uta sma rāsim pari yāsi gonam indreṇa soma saratham punānaḥ |  
 9.087.09c pūrvīr iṣo bṛhatīr jīradāno śikṣā śacīvas tava tā upaṣṭut ||

9.088.01a ayam soma indra tubhyam sunve tubhyam pavate tvam asya pāhi |  
 9.088.01c tvam ha yam cakṛṣe tvam vavrṣa indum madāya yujyāya somam ||  
 9.088.02a sa īm ratho na bhuriṣāḥ ayoji mahaḥ purūṇi sātaye vasūni |  
 9.088.02c ād īm viśvā nahuṣyāṇi jātā svarsātā vana ūrdhvā navanta ||  
 9.088.03a vāyur na yo niyutvām̃ iṣṭayāmā nāsatyeva hava ā śambhaviṣṭhaḥ |  
 9.088.03c viśvavāro draviṇodā iva tman pūṣeva dhījavano 'si soma ||  
 9.088.04a indro na yo mahā karmāṇi cakrir hantā vṛṭrāṇām asi soma pūrbhit |  
 9.088.04c paidvo na hi tvam ahināmnām hantā viśvasyāsi soma dasyoḥ ||  
 9.088.05a agnir na yo vana ā sṛjyamāno vṛthā pājāmsi kṛṇute nadīṣu |  
 9.088.05c jano na yudhvā mahata upabdir iyarti somaḥ pavamāna ūrmim ||  
 9.088.06a ete somā ati vārāṇy avyā divyā na kośāso abhravarṣāḥ |  
 9.088.06c vṛthā samudram sindhavo na nīcīḥ sutāso abhi kalaśām̃ asṛgran ||  
 9.088.07a śuṣmī śardho na mārutam pavasvānabhiśastā divyā yathā viṭ |  
 9.088.07c āpo na makṣū sumatir bhavā naḥ sahasrāpsāḥ pṛtanāṣāṇ na yajñāḥ ||  
 9.088.08a rājño nu te varuṇasya vratāni bṛhad gabhīram tava soma dhāma |  
 9.088.08c śuciṣ tvam asi priyo na mitro dakṣāyyo aryamevāsi soma ||

9.089.01a pro sya vahniḥ pathyābhir asyān divo na vṛṣṭiḥ pavamāno akṣāḥ |  
 9.089.01c sahasradhāro asadan ny asme mātūr upasthe vana ā ca somaḥ ||  
 9.089.02a rājā sindhūnām avasiṣṭa vāsa ṛtasya nāvam āruhad rajiṣṭhām |  
 9.089.02c apsu drapso vāvṛdhe śyenajūto duha īm pitā duha īm pitur jām ||  
 9.089.03a simham nasanta madhvo ayāsam harim aruṣam divo asya patim |  
 9.089.03c sūro yutsu prathamāḥ pṛchate gā asya cakṣasā pari pāty ukṣā ||  
 9.089.04a madhupṛṣṭham ghoram ayāsam aśvam rathe yuñjanty urucakra ṛṣvam |  
 9.089.04c svasāra īm jāmāyo marjayanti sanābhayo vājinam ūrjayanti ||  
 9.089.05a catasra īm ghṛtaduhaḥ sacante samāne antar dharuṇe niṣattāḥ |  
 9.089.05c tā īm arṣanti namasā punānās tā īm viśvataḥ pari śanti pūrvīḥ ||  
 9.089.06a viṣṭambho divo dharuṇaḥ pṛthivyā viśvā uta kṣitayo haste asya |  
 9.089.06c asat ta utso gṛṇate niyutvān madhvo amśuḥ pavata indriyāya ||  
 9.089.07a vanvann avāto abhi devavītim indrāya soma vṛtrahā pavasva |  
 9.089.07c śagdhi mahaḥ puruścandrasya rāyaḥ suvīryasya patayaḥ syāma ||

9.090.01a pra hinvāno janitā rodasyo ratho na vājam saniṣyann ayāsīt |  
 9.090.01c indram gacchann āyudhā samśiśāno viśvā vasu hastayor ādadhānaḥ ||  
 9.090.02a abhi triprṣṭham vṛṣaṇam vayodhām āngūṣāṇām avāvaśanta vāṇīḥ |  
 9.090.02c vanā vasāno varuṇo na sindhūn vi ratnadhā dayate vāryāni ||  
 9.090.03a sūrāgrāmaḥ sarvavīraḥ sahāvāñ jetā pavasva sanitā dhanāni |

9.090.03c tigmāyudhaḥ kṣipradhanvā samatsv aṣālhaḥ sāhvān pṛtanāsu śatrūn ||  
9.090.04a urugavyūtir abhayāni kṛṇvan samīcīne ā pavasvā puramdhī |  
9.090.04c apaḥ siṣāsann uṣasaḥ svar gāḥ sam cikrado maho asmabhyam vājān ||  
9.090.05a matsi soma varuṇam matsi mitram matsīndram indo pavamāna viṣṇum |  
9.090.05c matsi śardho mārutam matsi devān matsi mahām indram indo madāya ||  
9.090.06a evā rājeva kratumāṃ amena viśvā ghanighnad duritā pavasva |  
9.090.06c indo sūktāya vacase vayo dhā yūyam pāta svastibhiḥ sadā naḥ ||

9.091.01a asarji vakvā rathye yathājau dhiyā manotā prathamo manīṣī |  
9.091.01c daśa svasāro adhi sāno avye 'janti vahniṃ sadanāny accha ||  
9.091.02a vītī janasya divyasya kavyair adhi suvāno nahuṣyebhir induḥ |  
9.091.02c pra yo nṛbhir amṛto martyebhir marmṛjāno 'vibhir gobhir adbhiḥ ||  
9.091.03a vṛṣā vṛṣṇe roruvad amśur asmaī pavamāno ruśad īrte payo goḥ |  
9.091.03c sahasram ṛkvā pathibhir vacovid adhvasmabhiḥ sūro aṇvam vi yāti ||  
9.091.04a rujā dṛlḥā cid rakṣasaḥ sadāmsi punāna inda ūṛṇuhi vi vājān |  
9.091.04c vṛṣcopariṣṭāt tujatā vadhena ye anti dūrād upanāyam eṣām ||  
9.091.05a sa pratnavan navyase viśvavāra sūktāya pathaḥ kṛṇuhi prācaḥ |  
9.091.05c ye duḥṣahāso vanuṣā bṛhantas tāṃs te aśyāma purukṛt purukṣo ||  
9.091.06a evā punāno apaḥ svar gā asmabhyam tokā tanayāni bhūri |  
9.091.06c śam naḥ kṣetram uru jyotīmṣi soma jyoṇ naḥ sūryam dṛśaye rirīhi ||

9.092.01a pari suvāno harir amśuḥ pavitre ratho na sarji sanaye hiyānaḥ |  
9.092.01c āpac chlokam indriyam pūyamānaḥ prati devāṃ ajuṣata prayobhiḥ ||  
9.092.02a acchā nṛcakṣā asarat pavitre nāma dadhānaḥ kavir asya yonau |  
9.092.02c sīdan hoteva sadane camūṣūpem agmann ṛsayāḥ sapta viprāḥ ||  
9.092.03a pra sumedhā gātuvid viśvadevaḥ somaḥ punānaḥ sada eti nityam |  
9.092.03c bhuvad viśveṣu kāvyēṣu rantānu janān yatate pañca dhīraḥ ||  
9.092.04a tava tye soma pavamāna niṅye viśve devās traya ekādaśaḥ |  
9.092.04c daśa svadhābhir adhi sāno avye mṛjanti tvā nadyaḥ sapta yahvīḥ ||  
9.092.05a tan nu satyam pavamānasyāstu yatra viśve kāraḥ samnasanta |  
9.092.05c jyotir yad ahne akṛṇod u lokam prāvan manum dasyave kar abhīkam ||  
9.092.06a pari sadmeva paśumānti hotā rājā na satyaḥ samitīr iyānaḥ |  
9.092.06c somaḥ punānaḥ kalaśāṃ ayāsīt sīdan mṛgo na mahiṣo vaneṣu ||

9.093.01a sākamukṣo marjayanta svasāro daśa dhīrasya dhītayo dhanutṛḥ |  
9.093.01c hariḥ pary adravaj jāḥ sūryasya droṇam nanakṣe atyo na vājī ||  
9.093.02a sam mātrbhir na śīsur vāvaśāno vṛṣā dadhanve puruvāro adbhiḥ |  
9.093.02c maryo na yoṣām abhi niṣkṛtam yan sam gacchate kalaśa usriyābhiḥ ||  
9.093.03a uta pra pipya ūdhar aghnyāyā indur dhārābhiḥ sacate sumedhāḥ |  
9.093.03c mūrdhānam gāvaḥ payasā camūṣv abhi śrīṇanti vasubhir na niktaiḥ ||  
9.093.04a sa no devebhiḥ pavamāna radendo rayim aśvinam vāvaśānaḥ |  
9.093.04c rathirāyatām uśatī puramdhīr asmadryag ā dāvane vasūnām ||  
9.093.05a nū no rayim upa māsva nṛvantam punāno vātāpyam viśvaścandram |  
9.093.05c pra vanditur indo tāry āyuh prātar makṣū dhiyāvasur jagamyāt ||

9.094.01a adhi yad asmin vājīnīva śubha spardhante dhiyaḥ sūrye na viśaḥ |  
9.094.01c apo vṛṇānaḥ pavate kavīyan vrajam na paśuwardhanāya manma ||  
9.094.02a dvitā vyūrṇvan amṛtasya dhāma svarvide bhuvanāni prathanta |  
9.094.02c dhiyaḥ pinvānaḥ svasare na gāva ṛtāyantīr abhi vāvaśra indum ||  
9.094.03a pari yat kavīḥ kāvyā bharate sūro na ratho bhuvanāni viśvā |  
9.094.03c deveṣu yaśo martāya bhūṣan dakṣāya rāyaḥ purubhūṣu navyaḥ ||  
9.094.04a śriye jātaḥ śriya ā nir iyāya śriyam vayo jaritṛbhyo dadhāti |

9.094.04c śriyaṃ vasānā amṛtatvam āyan bhavanti satyā samithā mitadrau ||  
9.094.05a iṣam ūrjam abhy arṣāsvaṃ gāṃ uru jyotiḥ kṛṇuhi matsi devān |  
9.094.05c viśvāni hi suśahā tāni tubhyam pavamāna bādhasa soma śatrūn ||

9.095.01a kanikranti harir ā sṛjyamānaḥ sīdan vanasya jaṭhare punānaḥ |  
9.095.01c nṛbhir yataḥ kṛṇute nirṇijaṃ gā ato matīr janayata svadhābhiḥ ||  
9.095.02a hariḥ sṛjānaḥ pathyām ṛtasyeyarti vācam ariteva nāvam |  
9.095.02c devo devānām guhyāni nāmāviṣ kṛṇoti barhiṣi pravāce ||  
9.095.03a apām ived ūrmayas tarturāṇāḥ pra manīṣā īrate somam accha |  
9.095.03c namasyantīr upa ca yanti saṃ cā ca viśanty uśatīr uśantam ||  
9.095.04a tam marmṛjānam mahiṣaṃ na sānāv amśuṃ duhanty ukṣaṇaṃ giriṣṭhām |  
9.095.04c tam vāvaśānam matayaḥ sacante trito bibharti varuṇaṃ samudre ||  
9.095.05a iṣyan vācam upavakteva hotuḥ punāna indo vi śyā manīṣām |  
9.095.05c indraś ca yat kṣayathaḥ saubhagāya suvīryasya patayaḥ syāma ||

9.096.01a pra senānīḥ śūro agre rathānām gavyann eti harṣate asya senā |  
9.096.01c bhadrān kṛṇvann indrahavān sakhībhya ā somo vastrā rabhasāni datte ||  
9.096.02a sam asya harim harayo mṛjanty aśvahayair anīṣitaṃ namobhiḥ |  
9.096.02c ā tiṣṭhati ratham indrasya sakhā vidvāṃ enā sumatiṃ yāty accha ||  
9.096.03a sa no deva devatāte pavasva mahe soma psarasa indrapānaḥ |  
9.096.03c kṛṇvann apo varṣayan dyām utemām uror ā no varivasyā punānaḥ ||  
9.096.04a ajītaye 'hataye pavasva svastaye sarvatātaye bṛhate |  
9.096.04c tad uśanti viśva ime sakhāyas tad ahaṃ vaśmi pavamāna soma ||  
9.096.05a somaḥ pavate janitā matīnām janitā divo janitā pṛthivyāḥ |  
9.096.05c janitāgner janitā sūryasya janitendrasya janitota viṣṇoḥ ||  
9.096.06a brahmā devānām padavīḥ kavīnām ṛṣir viprāṇām mahiṣo mrgāṇām |  
9.096.06c śyeno gṛdhrāṇām svadhitiṣ vanānām somaḥ pavitram aty eti rebhan ||  
9.096.07a prāvīvipad vāca ūrmim na sindhur girāḥ somaḥ pavamāno manīṣāḥ |  
9.096.07c antaḥ paśyan vṛjanemāvarāṇy ā tiṣṭhati vṛṣabho goṣu jānan ||  
9.096.08a sa matsaraḥ pṛtsu vanvann avātaḥ sahasraretā abhi vājam arṣa |  
9.096.08c indrāyendo pavamāno manīṣy amśor ūrmim īraya gā iṣaṇyan ||  
9.096.09a pari priyaḥ kalaśe devavāta indrāya somo raṇyo madāya |  
9.096.09c sahasradhāraḥ śatavāja indur vājī na saptiḥ samanā jigāti ||  
9.096.10a sa pūrvyo vasuvij jāyamāno mṛjāno apsu duduhāno adrau |  
9.096.10c abhiśastipā bhuvanasya rājā vidad gātum brahmaṇe pūyamānaḥ ||  
9.096.11a tvayā hi naḥ pitarāḥ soma pūrve karmāṇi cakruḥ pavamāna dhīrāḥ |  
9.096.11c vanvann avātaḥ paridhīm̐r aporṇu vīrebhir aśvair maghavā bhavā naḥ ||  
9.096.12a yathāpavathā manave vayodhā amitrahā varivovid dhaviṣmān |  
9.096.12c evā pavasva draviṇaṃ dadhāna indre saṃ tiṣṭha janayāyudhāni ||  
9.096.13a pavasva soma madhumāṃ ṛtāvāpo vasāno adhi sāno avye |  
9.096.13c ava droṇāni ghṛtavānti sīda madintamo matsara indrapānaḥ ||  
9.096.14a vṛṣṭim divaḥ śatadhāraḥ pavasva sahasrasā vājayur devavītau |  
9.096.14c saṃ sindhubhiḥ kalaśe vāvaśānaḥ sam usriyābhiḥ pratiran na āyuh ||  
9.096.15a eṣa sya somo matibhiḥ punāno 'tyo na vājī taratīd arātīḥ |  
9.096.15c payo na dugdham aditer iṣiram urv iva gātuḥ suyamo na volhā ||  
9.096.16a svāyudhaḥ sotṛbhiḥ pūyamāno 'bhya arṣa guhyaṃ cāru nāma |  
9.096.16c abhi vājam saptir iva śravasyābhi vāyum abhi gā deva soma ||  
9.096.17a śiśuṃ jajñānaṃ haryatam mṛjanti śumbhanti vahnim maruto gaṇena |  
9.096.17c kavir gīrbhiḥ kāvyenā kaviḥ san somaḥ pavitram aty eti rebhan ||  
9.096.18a ṛṣimanā ya ṛṣikṛt svarṣāḥ sahasraṇīthaḥ padavīḥ kavīnām |  
9.096.18c tṛtīyam dhāma mahiṣaḥ siṣāsan somo virājam anu rājati ṣṭup ||  
9.096.19a camūṣac chyenaḥ śakuno vibhṛtvā govindur drapsa āyudhāni bibhrat |

9.096.19c apām ūrmiṁ sacamānaḥ samudraṁ turīyaṁ dhāma mahiṣo vivakti ||  
 9.096.20a maryo na śubhras tanvam mṛjāno 'tyo na sṛtvā sanaye dhanānām |  
 9.096.20c vṛṣeva yūthā pari kośam arṣan kanikradac camvor ā viveśa ||  
 9.096.21a pavasvendo pavamāno mahobhiḥ kanikradat pari vārāny arṣa |  
 9.096.21c krīḷaṅ camvor ā viśa pūyamāna indraṁ te raso madiro mamattu ||  
 9.096.22a prāsyā dhārā bṛhatīr asṛgrann akto gobhiḥ kalaśāṁ ā viveśa |  
 9.096.22c sāma kṛṇvan sāmānyo vipāscit krandann ety abhi sakhyur na jānim ||  
 9.096.23a apaghnann eṣi pavamāna śatrūn priyām na jāro abhigīta induḥ |  
 9.096.23c sīdan vaneṣu śakuno na patvā somaḥ punānaḥ kalaśeṣu sattā ||  
 9.096.24a ā te rucaḥ pavamānasya soma yoṣeva yanti sudughāḥ sudhārāḥ |  
 9.096.24c harir ānītaḥ puruvāro apsv acikradat kalaśe devayūnām ||

9.097.01a asya preṣā hemanā pūyamāno devo devebhiḥ sam aprkta rasam |  
 9.097.01c sutāḥ pavitram pary eti rebhan miteva sadma paśumānti hotā ||  
 9.097.02a bhadrā vastrā samanyā vasāno mahān kavir nivacanāni śaṁsan |  
 9.097.02c ā vacyasva camvoḥ pūyamāno vicakṣaṇo jāgṛvir devavītau ||  
 9.097.03a sam u priyo mṛjyate sāno avye yaśastaro yaśasām kṣaito asme |  
 9.097.03c abhi svāra dhanvā pūyamāno yūyam pāta svastibhiḥ sadā naḥ ||  
 9.097.04a pra gāyatābhy arcāma devān somaṁ hinota mahate dhanāya |  
 9.097.04c svāduḥ pavāte ati vāram avyam ā sīdāti kalaśaṁ devayur naḥ ||  
 9.097.05a indur devānām upa sakhyam āyan sahasradhāraḥ pavate madāya |  
 9.097.05c nṛbhi stavāno anu dhāma pūrvam agann indram mahate saubhagāya ||  
 9.097.06a stotre rāye harir arṣa punāna indram mado gacchatu te bharāya |  
 9.097.06c devair yāhi saratham rādho acchā yūyam pāta svastibhiḥ sadā naḥ ||  
 9.097.07a pra kāvyam uśaneva bruvāno devo devānām janimā vivakti |  
 9.097.07c mahivrataḥ śucibandhuḥ pāvakaḥ padā varāho abhy eti rebhan ||  
 9.097.08a pra haṁsāsas tṛpalam manyum acchāmād astam vṛṣagaṇā ayāsuḥ |  
 9.097.08c āngūṣyam pavamānaṁ sakhāyo durmarṣaṁ sākam pra vadanti vānam ||  
 9.097.09a sa raṁhata urugāyasya jūtiṁ vṛthā krīḷantam mimate na gāvaḥ |  
 9.097.09c pariṇasaṁ kṛṇute tigmaśṛṅgo divā harir dadṛṣe naktam ṛjraḥ ||  
 9.097.10a indur vājī pavate gonyoghā indre somaḥ saha invan madāya |  
 9.097.10c hanti rakṣo bād hate pary arātīr varivaḥ kṛṇvan vṛjanasya rājā ||  
 9.097.11a adha dhārayā madhvā pṛcānas tiro roma pavate adridugdhaḥ |  
 9.097.11c indur indrasya sakhyam juṣāno devo devasya matsaro madāya ||  
 9.097.12a abhi priyāni pavate punāno devo devān svena rasena pṛcān |  
 9.097.12c indur dharmāny ṛtuthā vasāno daśa kṣipo avyata sāno avye ||  
 9.097.13a vṛṣā śono abhikanikradad gā nadayann eti pṛthivīm uta dyām |  
 9.097.13c indrasyeva vagnur ā śṛṇva ājau pracetayann arṣati vācam emām ||  
 9.097.14a rasāyyaḥ payasā pinvamāna īrayann eṣi madhumantam amśum |  
 9.097.14c pavamānaḥ samtanim eṣi kṛṇvann indrāya soma pariṣicyamānaḥ ||  
 9.097.15a evā pavasva madiro madāyodagrābhasya namayan vadhasnaiḥ |  
 9.097.15c pari varṇam bharamāno ruśantaṁ gavayur no arṣa pari soma siktaḥ ||  
 9.097.16a juṣtvī na indo supathā sugāny urau pavasva varivāmsi kṛṇvan |  
 9.097.16c ghaneva viṣvag duritāni vighnann adhi ṣṇunā dhanva sāno avye ||  
 9.097.17a vṛṣṭim no arṣa divyām jigatnum ilāvātīm śaṁgayīm jīradānum |  
 9.097.17c stukeva vītā dhanvā vicinvan bandhūmr imām avarām indo vāyūn ||  
 9.097.18a granthim na vi śya grathitam punāna ṛjum ca gātum vṛjinam ca soma |  
 9.097.18c atyo na krado harir ā sṛjāno maryo deva dhanva pastyāvān ||  
 9.097.19a juṣto madāya devatāta indo pari ṣṇunā dhanva sāno avye |  
 9.097.19c sahasradhāraḥ surabhir adabdhaḥ pari srava vājasātau nṛṣahye ||  
 9.097.20a araśmāno ye 'rathā ayuktā atyāso na sasṛjānāsa ājau |  
 9.097.20c ete śukrāso dhanvanti somā devāsas tāṁ upa yātā pibadhyai ||

9.097.21a evā na indo abhi devavītim pari srava nabho arṇas camūṣu |  
 9.097.21c somo asmabhyam kāmyam bṛhantaṁ rayim dadātu vīravantaṁ ugram ||  
 9.097.22a takṣad yadī manaso venato vāg jyeṣṭhasya vā dharmaṇi kṣor anīke |  
 9.097.22c ād īm āyan varam ā vāvaśānā juṣṭam patim kalaśe gāva indum ||  
 9.097.23a pra dānudo divyo dānupinva ṛtam ṛtāya pavate sumedhāḥ |  
 9.097.23c dharmā bhuvad vṛjanyasya rājā pra raśmibhir daśabhir bhāri bhūma ||  
 9.097.24a pavitrebhiḥ pavamāno nṛcakṣā rājā devānām uta martyānām |  
 9.097.24c dvitā bhuvad rayipatī rayiṇām ṛtam bharaṭ subhṛtaṁ cārv induḥ ||  
 9.097.25a arvāṁ iva śravase sātīm acchendrasya vāyor abhi vītim arṣa |  
 9.097.25c sa naḥ sahasrā bṛhatīr iṣo dā bhavā soma draviṇovit punānaḥ ||  
 9.097.26a devāvyo naḥ pariṣicyamānāḥ kṣayam suvīram dhanvantu somāḥ |  
 9.097.26c āyajyavaḥ sumatim viśvavārā hotāro na diviyajo mandratamāḥ ||  
 9.097.27a evā deva devatāte pavasva mahe soma psarase devapānaḥ |  
 9.097.27c mahaś cid dhi śmasi hitāḥ samarye kṛdhi suṣṭhāne rodasī punānaḥ ||  
 9.097.28a aśvo no krado vṛṣabhir yujānaḥ simho na bhīmo manaso javīyān |  
 9.097.28c arvācīnaiḥ pathibhir ye rajiṣṭhā ā pavasva saumanasaṁ na indo ||  
 9.097.29a śataṁ dhārā devajātā asṛgran sahasram enāḥ kavayo mṛjanti |  
 9.097.29c indo sanitraṁ diva ā pavasva puraetāsi mahato dhanasya ||  
 9.097.30a divo na sargā asargram ahnām rājā na mitram pra mināti dhīraḥ |  
 9.097.30c pitur na putraḥ kratubhir yatāna ā pavasva viśe asyā ajītim ||  
 9.097.31a pra te dhārā madhumatīr asṛgran vārān yat pūto atyeṣy avyān |  
 9.097.31c pavamāna pavase dhāma gonām jajñānaḥ sūryam apinvo arkaiḥ ||  
 9.097.32a kanikradad anu panthām ṛtasya śukro vi bhāsy amṛtasya dhāma |  
 9.097.32c sa indrāya pavase matsaravān hinvāno vācam matibhiḥ kavīnām ||  
 9.097.33a divyaḥ suparṇo 'va cakṣi soma pinvan dhārāḥ karmaṇā devavītau |  
 9.097.33c endo viśa kalaśam somadhānam krandann ihi sūryasyopa raśmim ||  
 9.097.34a tisro vāca īrayati pra vahnir ṛtasya dhītim brahmaṇo manīṣām |  
 9.097.34c gāvo yanti gopatim pṛcchamānāḥ somaṁ yanti matayo vāvaśānāḥ ||  
 9.097.35a somaṁ gāvo dhenavo vāvaśānāḥ somaṁ viprā matibhiḥ pṛcchamānāḥ |  
 9.097.35c somaḥ sutaḥ pūyate ajyamānaḥ some arkās triṣṭubhaḥ sam navante ||  
 9.097.36a evā naḥ soma pariṣicyamāna ā pavasva pūyamānaḥ svasti |  
 9.097.36c indram ā viśa bṛhatā raveṇa vardhayā vācam janayā puramdhim ||  
 9.097.37a ā jāgrvir vipra ṛtā matīnām somaḥ punāno asadac camūṣu |  
 9.097.37c sapanti yam mithunāso nikāmā adhvaryavo rathirāsaḥ suhastāḥ ||  
 9.097.38a sa punāna upa sūre na dhātobhe aprā rodasī vi śa āvaḥ |  
 9.097.38c priyā cid yasya priyasāsa ūtī sa tū dhanam kāriṇe na pra yaṁsat ||  
 9.097.39a sa vardhitā vardhanaḥ pūyamānaḥ somo mīdhvāṁ abhi no jyotiṣāvīt |  
 9.097.39c yenā naḥ pūrve pitarāḥ padajñāḥ svarvido abhi gā adrim uṣṇan ||  
 9.097.40a akrān samudraḥ prathame vidharmañ janayan praajā bhuvanasya rājā |  
 9.097.40c vṛṣā pavitre adhi sāno avye bṛhat somo vāvṛdhe suvāna induḥ ||  
 9.097.41a mahat tat somo mahiṣas cakārāpām yad garbho 'vṛṇīta devān |  
 9.097.41c adadhād indre pavamāna ojo 'janayat sūrye jyotir induḥ ||  
 9.097.42a matsi vāyum iṣṭaye rādhase ca matsi mitrāvaruṇā pūyamānaḥ |  
 9.097.42c matsi śardho mārutam matsi devān matsi dyāvāpṛthivī deva soma ||  
 9.097.43a rjuḥ pavasva vṛjinasya hantāpāmīvām bādhamāno mṛdhaś ca |  
 9.097.43c abhiśrīṇan payaḥ payasābhi gonām indrasya tvaṁ tava vayam sakhāyaḥ ||  
 9.097.44a madhvaḥ sūdam pavasva vasva utsam vīram ca na ā pavasvā bhagam ca |  
 9.097.44c svadasvendrāya pavamāna indo rayim ca na ā pavasvā samudrāt ||  
 9.097.45a somaḥ suto dhārayātyo na hitvā sindhur na nimnam abhi vājy akṣāḥ |  
 9.097.45c ā yonim vanyam asadat punānaḥ sam indur gobhir asarat sam adbhiḥ ||  
 9.097.46a eṣa sya te pavata indra somaś camūṣu dhīra uśate tavasvān |  
 9.097.46c svarcakṣā rathiraḥ satyaśuṣmaḥ kāmo na yo devayatām asarji ||

9.097.47a eṣa pratnena vayasā punānas tiro varpāmsi duhitur dadhānaḥ |  
 9.097.47c vasānaḥ śarma trivarūtham apsu hoteva yāti samaneṣu rebhan ||  
 9.097.48a nū nas tvaṁ rathiro deva soma pari srava camvoḥ pūyamānaḥ |  
 9.097.48c apsu svādiṣṭho madhumāṁ ṛtāvā devo na yaḥ savitā satyamanmā ||  
 9.097.49a abhi vāyūṁ vīty arṣā gr̥ṇāno 'bhi mitrāvaruṇā pūyamānaḥ |  
 9.097.49c abhī naram dhījavanam ratheṣṭhām abhīndram vṛṣaṇam vajrabāhum ||  
 9.097.50a abhi vastrā suvasanāny arṣābhi dhenūḥ sudughāḥ pūyamānaḥ |  
 9.097.50c abhi candrā bhartave no hiraṇyābhy aśvān rathino deva soma ||  
 9.097.51a abhī no arṣa divyā vasūny abhi viśvā pārthivā pūyamānaḥ |  
 9.097.51c abhi yena draviṇam aśnavāmābhy ārṣeyam jamadagnivan naḥ ||  
 9.097.52a ayā pavā pavasvainā vasūni māṁścatva indo sarasi pra dhanva |  
 9.097.52c bradhnaś cid atra vāto na jūtaḥ purumedhaś cit takave naram dāt ||  
 9.097.53a uta na enā pavayā pavasvādhi śrute śravāyyasya tīrthe |  
 9.097.53c ṣaṣṭim sahasrā naiguto vasūni vṛkṣam na pakvam dhūnavad raṇāya ||  
 9.097.54a mahīme asya vṛṣanāma śūṣe māṁścatve vā pṛsane vā vadhatre |  
 9.097.54c asvāpayan nigutaḥ snehayac cāpāmitrām apācito acetah ||  
 9.097.55a sam trī pavitrā vitatāny eṣy anv ekaṁ dhāvasi pūyamānaḥ |  
 9.097.55c asi bhago asi dātrasya dātāsi maghavā maghavadbhya indo ||  
 9.097.56a eṣa viśvavit pavate manīṣī somo viśvasya bhuvanasya rājā |  
 9.097.56c drapsām īrayan vidatheṣv indur vi vāram avyam samayāti yāti ||  
 9.097.57a indum rihanti mahiṣā adabdhāḥ pade rebhanti kavayo na ḡdhrāḥ |  
 9.097.57c hinvanti dhīrā daśabhiḥ kṣipābhiḥ sam añjate rūpam apām rasena ||  
 9.097.58a tvayā vayam pavamānena soma bhare kṛtam vi cinuyāma śaśvat |  
 9.097.58c tan no mitro varuṇo māmahantām aditiḥ sindhuḥ pṛthivī uta dyauh ||

9.098.01a abhi no vājasātamaṁ rayim arṣa puruspr̥ham |  
 9.098.01c indo sahasrabharṇasaṁ tuvidyumnam vibhvāsaham ||  
 9.098.02a pari śya suvāno avyayaṁ rathe na varmāvyata |  
 9.098.02c indur abhi druṇā hito hiyāno dhārābhir akṣāḥ ||  
 9.098.03a pari śya suvāno akṣā indur avye madacyutaḥ |  
 9.098.03c dhārā ya ūrdhvo adhvare bhrājā naiti gavyayuh ||  
 9.098.04a sa hi tvaṁ deva śaśvate vasu martāya dāśuṣe |  
 9.098.04c indo sahasriṇam rayim śatātmānam vivāsasi ||  
 9.098.05a vayam te asya vṛtrahan vaso vasvaḥ puruspr̥haḥ |  
 9.098.05c ni nediṣṭhatamā iṣaḥ syāma sumnasyādhriḡo ||  
 9.098.06a dvir yam pañca svayaśasaṁ svasāro adrisamhatam |  
 9.098.06c priyam indrasya kāmyam prasnāpayanty ūrmiṇam ||  
 9.098.07a pari tyam haryataṁ harim babhrum punanti vāreṇa |  
 9.098.07c yo devān viśvām it pari madena saha gacchati ||  
 9.098.08a asya vo hy avasā pānto dakṣasādhanam |  
 9.098.08c yaḥ sūriṣu śravo bṛhad dadhe svar ṇa haryataḥ ||  
 9.098.09a sa vām yajñeṣu mānavī indur janiṣṭa rodasī |  
 9.098.09c devo devī giriṣṭhā asredhan tam tuviṣvaṇi ||  
 9.098.10a indrāya soma pātave vṛtraghne pari ṣicyase |  
 9.098.10c nare ca dakṣiṇāvate devāya sadanāsade ||  
 9.098.11a te pratnāso vyuṣṭiṣu somāḥ pavitre akṣaran |  
 9.098.11c apaprothantaḥ sanutar huraścitaḥ prātas tām apracetasah ||  
 9.098.12a tam sakhāyah purorucam yūyam vayam ca sūrayah |  
 9.098.12c aśyāma vājagandhyam sanema vājapastyam ||

9.099.01a ā haryatāya dhṛṣṇave dhanus tanvanti paumsyam |  
 9.099.01c śukrām vayanty asurāya nirṇijam vipām agre mahīyuvah ||

9.099.02a adha kṣapā pariṣkr̥to vājāṃ abhi pra gāhate |  
 9.099.02c yadī vivasvato dhiyo hariṃ hinvanti yātave ||  
 9.099.03a tam asya marjayāmasi mado ya indrapātamaḥ |  
 9.099.03c yaṃ gāva āsabhīr dadhuḥ purā nūnaṃ ca sūrayaḥ ||  
 9.099.04a taṃ gāthayā purāṇyā punānam abhy anūṣata |  
 9.099.04c uto kṛpanta dhītayo devānām nāma bibhratīḥ ||  
 9.099.05a tam ukṣamāṇam avyaye vāre punanti dharmasim |  
 9.099.05c dūtaṃ na pūrvacittaya ā śāsate maṇiṣiṇaḥ ||  
 9.099.06a sa punāno madintamaḥ somaś camūṣu sīdati |  
 9.099.06c paśau na reta ādadhat patir vacasyate dhiyaḥ ||  
 9.099.07a sa mṛjyate sukarmabhir devo devebhyaḥ sutaḥ |  
 9.099.07c vide yad āsu saṃdadir mahīr apo vi gāhate ||  
 9.099.08a suta indo pavitra ā nṛbhir yato vi nīyase |  
 9.099.08c indrāya matsarintamaś camūṣv ā ni śīdasi ||

9.100.01a abhī navante adruhaḥ priyam indrasya kāmyam |  
 9.100.01c vatsaṃ na pūrva āyuni jātaṃ rihanti mātaraḥ ||  
 9.100.02a punāna indav ā bhara soma dvibarhasaṃ rayim |  
 9.100.02c tvaṃ vasūni puṣyasi viśvāni dāśuṣo gr̥he ||  
 9.100.03a tvaṃ dhiyam manoyujāṃ sr̥jā vṛṣṭiṃ na tanyatuḥ |  
 9.100.03c tvaṃ vasūni pārvithivā divyā ca soma puṣyasi ||  
 9.100.04a pari te jigyuṣo yathā dhārā sutasya dhāvati |  
 9.100.04c raṃhamāṇā vy avyayaṃ vāraṃ vājīva sānasiḥ ||  
 9.100.05a kratve dakṣāya naḥ kave pavasva soma dhārayā |  
 9.100.05c indrāya pātave suto mitrāya varuṇāya ca ||  
 9.100.06a pavasva vājasātamaḥ pavitre dhārayā sutaḥ |  
 9.100.06c indrāya soma viṣṇave devebhyo madhumattamaḥ ||  
 9.100.07a tvāṃ rihanti mātaro harim pavitre adruhaḥ |  
 9.100.07c vatsaṃ jātaṃ na dhenavaḥ pavamāna vidharmaṇi ||  
 9.100.08a pavamāna mahi śravaś citrebhīr yāsi raśmibhiḥ |  
 9.100.08c śardhan tamāmsi jighnase viśvāni dāśuṣo gr̥he ||  
 9.100.09a tvaṃ dyāṃ ca mahivrata pṛthivīm cāti jabhriṣe |  
 9.100.09c prati dr̥pim amuñcathāḥ pavamāna mahitvanā ||

9.101.01a purojitī vo andhasaḥ sutāya mādayitnave |  
 9.101.01c apa śvānaṃ śnathiṣṭana sakhāyo dīrghajihvyam ||  
 9.101.02a yo dhārayā pāvakayā pariprasyaṇdate sutaḥ |  
 9.101.02c indur aśvo na kṛtvyaḥ ||  
 9.101.03a taṃ duroṣam abhī naraḥ somaṃ viśvācyā dhiyā |  
 9.101.03c yajñāṃ hinvanty adribhiḥ ||  
 9.101.04a sutāso madhumattamāḥ somā indrāya mandinaḥ |  
 9.101.04c pavitravanto akṣaran devān gacchantu vo madāḥ ||  
 9.101.05a indur indrāya pavata iti devāso abruvan |  
 9.101.05c vācas patir makhasyate viśvasyeśāna ojasā ||  
 9.101.06a sahasradhāraḥ pavate samudro vācamīṅkhayaḥ |  
 9.101.06c somaḥ patī rayīṇām sakhendrasya dive-dive ||  
 9.101.07a ayam pūṣā rayir bhagaḥ somaḥ punāno arṣati |  
 9.101.07c patir viśvasya bhūmano vy akhyad rodasī ubhe ||  
 9.101.08a sam u priyā anūṣata gāvo madāya ghr̥ṣvayaḥ |  
 9.101.08c somāsaḥ kṛṇvate pathaḥ pavamānāsa indavaḥ ||  
 9.101.09a ya ojiṣṭhas tam ā bhara pavamāna śravāyyam |  
 9.101.09c yaḥ pañca carṣaṇīr abhi rayiṃ yena vanāmahai ||

9.101.10a somāḥ pavanta indavo 'smabhyaṃ gātuvittamāḥ |  
 9.101.10c mitrāḥ suvānā arepasah svādhyah svarvidaḥ ||  
 9.101.11a suṣvāṇāso vy adribhiś citānā gor adhi tvaci |  
 9.101.11c iṣam asmabhyam abhitaḥ sam asvaran vasuvidaḥ ||  
 9.101.12a ete pūtā vipaścitaḥ somāso dadhyāśiraḥ |  
 9.101.12c sūryāso na darśatāso jigatnavo dhruvā ghr̥te ||  
 9.101.13a pra sunvānasyāndhaso marto na vṛta tad vacaḥ |  
 9.101.13c apa śvānam arādhasaṃ hatā makhaṃ na bhrgavaḥ ||  
 9.101.14a ā jāmir atke avyata bhujē na putra oṇyoḥ |  
 9.101.14c saraj jāro na yoṣaṇām varo na yonim āsadam ||  
 9.101.15a sa vīro dakṣasādhanō vi yas tastambha rodasī |  
 9.101.15c hariḥ pavitre avyata vedhā na yonim āsadam ||  
 9.101.16a avyo vārebhiḥ pavate somo gavye adhi tvaci |  
 9.101.16c kanikradad vṛṣā harir indrasyaḥbhy eti niṣkṛtam ||

9.102.01a krāṇā śīsur mahīnām hinvaṇṇ ṛtasya dīdhitim |  
 9.102.01c viśvā pari priyā bhuvad adha dvitā ||  
 9.102.02a upa tritasya pāṣyor abhakta yad guhā padam |  
 9.102.02c yajñasya sapta dhāmabhir adha priyam ||  
 9.102.03a trīṇi tritasya dhārayā pṛṣṭheṣv erayā rayim |  
 9.102.03c mimīte asya yojanā vi sukratuḥ ||  
 9.102.04a jajñānam sapta mātaro vedhām aśāsata śriye |  
 9.102.04c ayaṃ dhruvo rayīṇām ciketa yat ||  
 9.102.05a asya vrata sajoṣaso viśve devāso adruhaḥ |  
 9.102.05c spārhā bhavanti rantayo juṣanta yat ||  
 9.102.06a yam ī garbham ṛtāvṛdho dr̥ṣe cārum ajjjanan |  
 9.102.06c kavim maṃhiṣṭham adhvare puruspr̥ham ||  
 9.102.07a samīcīne abhi tmanā yahvī ṛtasya mātara |  
 9.102.07c tanvānā yajñam ānuṣag yad añjate ||  
 9.102.08a kratvā śukrebhir akṣabhir ṛṇor apa vrajam divaḥ |  
 9.102.08c hinvaṇṇ ṛtasya dīdhitim prādhvare ||

9.103.01a pra punānāya vedhase somāya vaca udyatam |  
 9.103.01c bhṛtim na bhara matibhir juṣate ||  
 9.103.02a pari vārāṇy avyayā gobhir añjāno arṣati |  
 9.103.02c trī ṣadhasthā punānaḥ kṛṇute hariḥ ||  
 9.103.03a pari koṣam madhuścutam avyaye vāre arṣati |  
 9.103.03c abhi vāṇīr ṛṣīṇām sapta nūṣata ||  
 9.103.04a pari ṇetā matīnām viśvadevo adābhyah |  
 9.103.04c somaḥ punānaś camvor viśad dhariḥ ||  
 9.103.05a pari daivīr anu svadhā indreṇa yāhi saratham |  
 9.103.05c punāno vāghad vāghadbhir amartyah ||  
 9.103.06a pari saptir na vājayur devo devebhyah sutah |  
 9.103.06c vyānaśiḥ pavamāno vi dhāvati ||

9.104.01a sakhāya ā ni śīdata punānāya pra gāyata |  
 9.104.01c śīsum na yajñaiḥ pari bhūṣata śriye ||  
 9.104.02a sam ī vatsam na mātr̥bhiḥ sṛjatā gayasādhanam |  
 9.104.02c devāvyam madam abhi dviśavasam ||  
 9.104.03a punātā dakṣasādhanam yathā śardhāya vītaye |  
 9.104.03c yathā mitrāya varuṇāya śamtamaḥ ||  
 9.104.04a asmabhyaṃ tvā vasuvidam abhi vāṇīr anūṣata |

9.104.04c gobhiṣ te varṇam abhi vāsayāmasi ||  
9.104.05a sa no madānām pata indo devapsarā asi |  
9.104.05c sakheva sakhye gātuvittamo bhava ||  
9.104.06a sanemi kṛdhy asmad ā rakṣasam kam cid atrīṇam |  
9.104.06c apādevaṁ dvayum aṁho yuyodhi naḥ ||

9.105.01a taṁ vaḥ sakhāyo madāya punānam abhi gāyata |  
9.105.01c śiśum na yajñaiḥ svadayanta gūrtibhiḥ ||  
9.105.02a sam vatsa iva mātṛbhir indur hinvāno ajyate |  
9.105.02c devāvīr mado matibhiḥ pariṣkṛtaḥ ||  
9.105.03a ayam daksāya sādhanō 'yam śardhāya vītaye |  
9.105.03c ayam devebhyo madhumattamaḥ sutaḥ ||  
9.105.04a goman na indo aśvavat sutaḥ sudakṣa dhanva |  
9.105.04c śucim te varṇam adhi goṣu dīdharam ||  
9.105.05a sa no harīnām pata indo devapsarastamaḥ |  
9.105.05c sakheva sakhye naryo ruce bhava ||  
9.105.06a sanemi tvam asmad āṁ adevaṁ kam cid atrīṇam |  
9.105.06c sāhvām indo pari bādho apa dvayum ||

9.106.01a indram accha sutā ime vṛṣaṇam yantu harayaḥ |  
9.106.01c śruṣṭī jātāsa indavaḥ svarvidaḥ ||  
9.106.02a ayam bharāya sānasir indrāya pavate sutaḥ |  
9.106.02c somo jaitrasya cetati yathā vide ||  
9.106.03a asyed indro madeṣv ā grābham gr̥bhñīta sānasim |  
9.106.03c vajram ca vṛṣaṇam bharaṭ sam apsuḥ ||  
9.106.04a pra dhanvā soma jāgrvir indrāyendo pari srava |  
9.106.04c dyumantaṁ śuṣmam ā bharaḥ svarvidam ||  
9.106.05a indrāya vṛṣaṇam madam pavasva viśvadarśataḥ |  
9.106.05c sahasrayāmā pathikṛd vicakṣaṇaḥ ||  
9.106.06a asmabhyam gātuvittamo devebhyo madhumattamaḥ |  
9.106.06c sahasram yāhi pathibhiḥ kanikradat ||  
9.106.07a pavasva devavītaya indo dhārābhir ojasā |  
9.106.07c ā kalaśam madhumān soma naḥ sadaḥ ||  
9.106.08a tava drapsā udapruta indram madāya vāvṛdhuḥ |  
9.106.08c tvām devāso amṛtāya kam papuḥ ||  
9.106.09a ā naḥ sutāsa indavaḥ punānā dhāvātā rayim |  
9.106.09c vṛṣṭidyāvo rītyāpaḥ svarvidaḥ ||  
9.106.10a somaḥ punāna ūrmiṇāvyo vāram vi dhāvati |  
9.106.10c agre vācaḥ pavamānaḥ kanikradat ||  
9.106.11a dhībhir hinvanti vājinaṁ vane kṛlāntam atyavim |  
9.106.11c abhi triprṣṭham matayaḥ sam asvaran ||  
9.106.12a asarji kalaśam abhi mīlḥe saptir na vājayuḥ |  
9.106.12c punāno vācam janayann asiṣyadat ||  
9.106.13a pavate haryato harir ati hvarāmsi ramhyā |  
9.106.13c abhyarṣan stotṛbhyo vīravat yaśaḥ ||  
9.106.14a ayā pavasva devayur madhor dhārā asṛkṣata |  
9.106.14c rebhan pavitram pary eṣi viśvataḥ ||

9.107.01a parīto śiñcatā sutam somo ya uttamaṁ haviḥ |  
9.107.01c dadhanvām yo naryo apsv antar ā suśāva somam adribhiḥ ||  
9.107.02a nūnam punāno 'vibhiḥ pari sravādabdhaḥ surabhintaraḥ |  
9.107.02c sute cit tvāpsu madāmo andhasā śrīṇanto gobhir uttaram ||

- 9.107.03a pari suvānaś cakṣase devamādanaḥ kratur indur vicakṣaṇaḥ ||  
9.107.04a punānaḥ soma dhārayāpo vasāno arṣasi |  
9.107.04c ā ratnadhā yonim ṛtasya sīdasy utso deva hiranyayaḥ ||  
9.107.05a duhāna ūdhar divyam madhu priyam pratnaṁ sadhastham āsadat |  
9.107.05c āpṛcchyaṁ dharuṇaṁ vājy arṣati nṛbhir dhūto vicakṣaṇaḥ ||  
9.107.06a punānaḥ soma jāgrvir avyo vāre pari priyaḥ |  
9.107.06c tvaṁ vipro abhavo 'ngirastamo madhvā yajñam mimikṣa naḥ ||  
9.107.07a somo mīdhvān pavate gātuvittama ṛṣir vipro vicakṣaṇaḥ |  
9.107.07c tvaṁ kavir abhavo devavītama ā sūryaṁ rohayo divi ||  
9.107.08a soma u ṣuvānaḥ soṭṛbhir adhi ṣṇubhir avīnām |  
9.107.08c aśvayeve haritā yāti dhārayā mandrayā yāti dhārayā ||  
9.107.09a anūpe gomān gobhir akṣāḥ somo dugdhābhir akṣāḥ |  
9.107.09c samudraṁ na samvaraṇāny agman mandī madāya tośate ||  
9.107.10a ā soma suvāno adribhis tiro vārāny avyayā |  
9.107.10c jano na puri camvor viśad dhariḥ sado vaneṣu dadhiṣe ||  
9.107.11a sa māmṛje tiro aṇvāni meṣyo mīlḥe saptir na vājayuḥ |  
9.107.11c anumādyāḥ pavamāno manīṣibhiḥ somo viprebhir ṛkvabhiḥ ||  
9.107.12a pra soma devavītaye sindhur na pipye arṇasā |  
9.107.12c aṁśoḥ payasā madiro na jāgrvir acchā kośam madhuścutam ||  
9.107.13a ā haryato arjune atke avyata priyaḥ sūnur na marjyaḥ |  
9.107.13c tam īm hinvanty apaso yathā rathaṁ nadīṣv ā gabhastyoḥ ||  
9.107.14a abhi somāsa āyavaḥ pavante madyam madam |  
9.107.14c samudrasyādhi viṣṭapi manīṣiṇo matsarāsaḥ svarvidaḥ ||  
9.107.15a tarat samudram pavamāna ūrminā rājā deva ṛtam bṛhat |  
9.107.15c arṣan mitrasya varuṇasya dharmaṇā pra hinvāna ṛtam bṛhat ||  
9.107.16a nṛbhir yemāno haryato vicakṣaṇo rājā devaḥ samudriyaḥ ||  
9.107.17a indrāya pavate madaḥ somo marutvate sutaḥ |  
9.107.17c sahasradhāro aty avyam arṣati tam ī mrjanty āyavaḥ ||  
9.107.18a punānaś camū janayan matiṁ kaviḥ somo deveṣu raṇyati |  
9.107.18c apo vasānaḥ pari gobhir uttaraḥ sīdan vaneṣv avyata ||  
9.107.19a tavāham soma rāraṇa sakhya indo dive-dive |  
9.107.19c purūṇi babhro ni caranti mām ava paridhīmṛ ati tāṁ ihi ||  
9.107.20a utāham naktam uta soma te divā sakhyāya babhra ūdhani |  
9.107.20c ghrṇā tapantam ati sūryam paraḥ śakunā iva paptima ||  
9.107.21a mṛjyamānaḥ suhastya samudre vācam invasi |  
9.107.21c rayim piśaṅgam bahulam purusṛham pavamānābhy arṣasi ||  
9.107.22a mṛjāno vāre pavamāno avyaye vṛṣāva cakrado vane |  
9.107.22c devānām soma pavamāna niṣkṛtaṁ gobhir añjāno arṣasi ||  
9.107.23a pavasva vājasātaye 'bhi viśvāni kāvyā |  
9.107.23c tvaṁ samudram prathamo vi dhārayo devebhyaḥ soma matsaraḥ ||  
9.107.24a sa tū pavasva pari pārthivaṁ rajo divyā ca soma dharmabhiḥ |  
9.107.24c tvām viprāso matibhir vicakṣaṇa śubhraṁ hinvanti dhītibhiḥ ||  
9.107.25a pavamānā asṛkṣata pavitram ati dhārayā |  
9.107.25c marutvanto matsarā indriyā hayā medhām abhi prayāmsi ca ||  
9.107.26a apo vasānaḥ pari kośam arṣatīndur hiyānaḥ soṭṛbhiḥ |  
9.107.26c janayaṅ jyotir mandanā avīvaśad gāḥ kṛṇvāno na nirṇijam ||
- 9.108.01a pavasva madhumattama indrāya soma kratuvittamo madaḥ |  
9.108.01c mahi dyukṣatamo madaḥ ||  
9.108.02a yasya te pītvā vṛṣabho vṛṣāyate 'sya pītā svarvidaḥ |  
9.108.02c sa supraketo abhy akramīd iṣo 'cchā vājam naitasāḥ ||  
9.108.03a tvaṁ hy aṅga daivyā pavamāna janimāni dyumattamaḥ |

- 9.108.03c amṛtatvāya ghoṣayaḥ ||  
9.108.04a yenā navagvo dadhyaññ apornute yena viprāsa āpire |  
9.108.04c devānām sumne amṛtasya cāruṇo yena śravāmsy ānaśuḥ ||  
9.108.05a eṣa sya dhārayā suto 'vyo vārebhiḥ pavate madintamaḥ |  
9.108.05c krīḷann ūrmir apām iva ||  
9.108.06a ya usriyā apyā antar aśmano nir gā akṛntad ojasā |  
9.108.06c abhi vrajam̄ tatniṣe gavyam aśvyam varmīva dhr̥ṣṇav ā ruja ||  
9.108.07a ā sotā pari ṣiñcatāśvam̄ na stomam apturam̄ rajasturam |  
9.108.07c vanakraḥsam udaprutam ||  
9.108.08a sahasradhāram̄ vṛṣabham payovṛdham priyam̄ devāya janmane |  
9.108.08c ṛtena ya ṛtajāto vivāvṛdhe rājā deva ṛtam bṛhat ||  
9.108.09a abhi dyumnam bṛhad yaśa iṣas pate didīhi deva devayuh |  
9.108.09c vi kośam madhyamaḥ yuva ||  
9.108.10a ā vacyasva sudakṣa camvoḥ suto viśām vahnir na viśpatiḥ |  
9.108.10c vṛṣṭim̄ divaḥ pavasva rītim̄ apām̄ jinvā gaviṣṭaye dhiyaḥ ||  
9.108.11a etam u tyam madacyutam̄ sahasradhāram̄ vṛṣabham̄ divo duhuḥ |  
9.108.11c viśvā vasūni bibhratam ||  
9.108.12a vṛṣā vi jajñe janayann amartyaḥ pratapañ jyotiṣā tamaḥ |  
9.108.12c sa suṣṭutaḥ kavibhir nirṇijam̄ dadhe tridhātv asya damśasā ||  
9.108.13a sa sunve yo vasūnām̄ yo rāyām̄ ānetā ya ilānām |  
9.108.13c somo yaḥ sukṣitīnām ||  
9.108.14a yasya na indraḥ pibād yasya maruto yasya vāryamaṇā bhagaḥ |  
9.108.14c ā yena mitrāvaruṇā karāmaha endram avase mahe ||  
9.108.15a indrāya soma pātave nṛbhir yataḥ svāyudho madintamaḥ |  
9.108.15c pavasva madhumattamaḥ ||  
9.108.16a indrasya hārdi somadhānam ā viśa samudram iva sindhavaḥ |  
9.108.16c juṣṭo mitrāya varuṇāya vāyave divo viṣṭambha uttamaḥ ||
- 9.109.01a pari pra dhanvendrāya soma svādur mitrāya pūṣṇe bhagāya ||  
9.109.02a indras te soma sutasya peyāḥ kratve dakṣāya viśve ca devāḥ ||  
9.109.03a evāmṛtāya mahe kṣayāya sa śukro arṣa divyaḥ pīyūṣaḥ ||  
9.109.04a pavasva soma mahān samudraḥ pitā devānām̄ viśvābhi dhāma ||  
9.109.05a śukraḥ pavasva devebhyaḥ soma dive pṛthivyai śam̄ ca prajāyai ||  
9.109.06a divo dhartāsi śukraḥ pīyūṣaḥ satye vidharman vājī pavasva ||  
9.109.07a pavasva soma dyumnī sudhāro mahām̄ avīnām̄ anu pūrvyāḥ ||  
9.109.08a nṛbhir yemāno jajñānaḥ pūtaḥ kṣarad viśvāni mandraḥ svarvit ||  
9.109.09a induḥ punānaḥ prajāḥ urāṇaḥ karad viśvāni draviṇāni naḥ ||  
9.109.10a pavasva soma kratve dakṣāyāśvo na nikto vājī dhanāya ||  
9.109.11a tam̄ te sotāro rasam madāya punanti somam mahe dyumnāya ||  
9.109.12a śīsum̄ jajñānam̄ harim̄ mṛjanti pavitre somam̄ devebhya indum ||  
9.109.13a induḥ paviṣṭa cārur madāyāpām̄ upasthe kavir bhagāya ||  
9.109.14a bibharti cārv indrasya nāma yena viśvāni vṛtrā jaghāna ||  
9.109.15a pibanty asya viśve devāso gobhiḥ śrītasya nṛbhiḥ sutasya ||  
9.109.16a pra suvāno akṣāḥ sahasradhāras tiraḥ pavitraḥ vi vāram̄ avyam ||  
9.109.17a sa vājy akṣāḥ sahasraretā adbhīr mṛjāno gobhiḥ śrīṇānaḥ ||  
9.109.18a pra soma yāhīndrasya kukṣā nṛbhir yemāno adribhiḥ sutaḥ ||  
9.109.19a asarji vājī tiraḥ pavitraḥ indrāya somaḥ sahasradhāraḥ ||  
9.109.20a añjanty enam madhvo rasenendrāya vṛṣṇa indum madāya ||  
9.109.21a devebhyas tvā vṛthā pājase 'po vasānam̄ harim̄ mṛjanti ||  
9.109.22a indur indrāya tośate ni tośate śrīṇann ugro riṇann apaḥ ||
- 9.110.01a pary ū ṣu pra dhanva vājasātaye pari vṛtrāni sakṣaṇiḥ |

- 9.110.01c dviṣas taradhyā ṛṇayā na īyase ||  
9.110.02a anu hi tvā sutam̐ soma madāmasi mahe samaryarājye |  
9.110.02c vājāṃ abhi pavamāna pra gāhase ||  
9.110.03a ajījano hi pavamāna sūryam̐ vidhāre śakmanā payaḥ |  
9.110.03c gojīrayā ram̐hamāṇaḥ puram̐dhyā ||  
9.110.04a ajījano amṛta martyeṣv āṃ ṛtasya dharmann amṛtasya cāruṇaḥ |  
9.110.04c sadāsaro vājam acchā saniṣyadat ||  
9.110.05a abhy-abhi hi śravasā tatardithotsam̐ na kam̐ cij janapānam akṣitam |  
9.110.05c śaryābhir na bharamāṇo gabhastyoḥ ||  
9.110.06a ād īm ke cit paśyamānāsa āpyam̐ vasuruco divyā abhy anūṣata |  
9.110.06c vāram̐ na devaḥ savitā vy ūṛṇute ||  
9.110.07a tve soma prathamā vṛktabarhiṣo mahe vājāya śravase dhiyam̐ dadhuḥ |  
9.110.07c sa tvam̐ no vīra vīryāya codaya ||  
9.110.08a divaḥ pīyūṣam̐ pūrvyam̐ yad ukthyam̐ maho gāhād diva ā nir adhuḥṣata |  
9.110.08c indram̐ abhi jāyamānam̐ sam asvaran ||  
9.110.09a adha yad ime pavamāna rodasī imā ca viśvā bhuvanābhi majmanā |  
9.110.09c yūthe na niṣṭhā vṛṣabho vi tiṣṭhase ||  
9.110.10a somaḥ punāno avyaye vāre śīsur na krīlan pavamāno akṣāḥ |  
9.110.10c sahasradhāraḥ śatavāja induḥ ||  
9.110.11a eṣa punāno madhumāṃ ṛtāvendrāyenduḥ pavate svādur ūrmih̐ |  
9.110.11c vājasanir varivovid vayodhāḥ ||  
9.110.12a sa pavasva sahamānaḥ pṛtanyūn sedhan rakṣāmsy apa durgahāṇi |  
9.110.12c svāyudhaḥ sāsahvān soma śatrūn ||
- 9.111.01a ayā rucā hariṇyā punāno viśvā dveṣāmsi tarati svayugvabhiḥ sūro na svayugvabhiḥ |  
9.111.01d dhārā sutasya rocate punāno aruṣo hariḥ |  
9.111.01f viśvā yad rūpā pariyāty ṛkvabhiḥ saptāsyebhir ṛkvabhiḥ ||  
9.111.02a tvam̐ tyat paṇīnām̐ vido vasu sam mātṛbhir marjayasi sva ā dama ṛtasya dhītibhir dame |  
9.111.02d parāvato na sāma tad yatrā raṇanti dhītayaḥ |  
9.111.02f tridhātubhir aruṣībhir vayo dadhe rocamāno vayo dadhe ||  
9.111.03a pūrvām̐ anu pradiśam̐ yāti cekitat sam̐ raśmibhir yatate darśato ratho daivyo darśato rathaḥ |  
9.111.03d agmann ukthāni pauṃsyendram̐ jaitrāya harṣayan |  
9.111.03f vajraś ca yad bhavatho anapacyutā samatsv anapacyutā ||
- 9.112.01a nānānam̐ vā u no dhiyo vi vratāni janānām̐ |  
9.112.01c takṣā riṣtam̐ rutam̐ bhiṣag brahmā sunvantam̐ icchatīndrāyendo pari srava ||  
9.112.02a jaratībhir oṣadhībhiḥ parṇebhiḥ śakunānām̐ |  
9.112.02c kārmāro aśmabhir dyubhir hiraṇyavantam̐ icchatīndrāyendo pari srava ||  
9.112.03a kārur aham̐ tato bhiṣag upalaprakṣiṇī nanā |  
9.112.03c nānādhiyo vasūyavo 'nu gā iva tasthimendrāyendo pari srava ||  
9.112.04a aśvo volhā sukham̐ ratham̐ hasanām̐ upamantriṇaḥ |  
9.112.04c śepo romaṇvantau bhedau vār in maṇḍūka icchatīndrāyendo pari srava ||
- 9.113.01a śaryānāvati somam̐ indraḥ pibatu vṛtrahā |  
9.113.01c balam̐ dadhāna ātmani kariṣyan vīryam̐ mahad indrāyendo pari srava ||  
9.113.02a ā pavasva diśām̐ pata ārjikāt soma mīdhvaḥ |  
9.113.02c ṛtavākena satyena śraddhayā tapasā suta indrāyendo pari srava ||  
9.113.03a parjanyaṽrddham̐ mahiṣam̐ tam̐ sūryasya duhitābharat |  
9.113.03c tam̐ gandharvāḥ praty agr̐bhṇan tam̐ some rasam̐ ādadhur indrāyendo pari srava ||  
9.113.04a ṛtam̐ vadann ṛtadyumna satyam̐ vadan satyakarman |  
9.113.04c śraddhām̐ vadan soma rājan dhātṛā soma pariṣkṛta indrāyendo pari srava ||

- 9.113.05a satyamugrasya bṛhataḥ saṁ sravanti saṁsravāḥ |  
 9.113.05c saṁ yanti rasino rasāḥ punāno brahmaṇā hara indrāyendo pari srava ||  
 9.113.06a yatra brahmā pavamāna chandasyām vācam vadan |  
 9.113.06c grāvṇā some mahīyate somenāndaṁ janayann indrāyendo pari srava ||  
 9.113.07a yatra jyotir ajasraṁ yasmiṁ l l oke svar hitam |  
 9.113.07c tasmin mām dhehi pavamānāmṛte l oke akṣita indrāyendo pari srava ||  
 9.113.08a yatra rājā vaivasvato yatrāvarodhanam divaḥ |  
 9.113.08c yatrāmūr yahvatīr āpas tatra mām amṛtaṁ kṛdhīndrāyendo pari srava ||  
 9.113.09a yatrānukāmaṁ caraṇam trināke tridive divaḥ |  
 9.113.09c lokā yatra jyotiṣmantas tatra mām amṛtaṁ kṛdhīndrāyendo pari srava ||  
 9.113.10a yatra kāmā nikāmās ca yatra bradhnsya viṣṭapam |  
 9.113.10c svadhā ca yatra ṛptiś ca tatra mām amṛtaṁ kṛdhīndrāyendo pari srava ||  
 9.113.11a yatrānandās ca modās ca mudaḥ pramuda āsate |  
 9.113.11c kāmasya yatrāptāḥ kāmās tatra mām amṛtaṁ kṛdhīndrāyendo pari srava ||
- 9.114.01a ya indoḥ pavamānasyānu dhāmāny akramīt |  
 9.114.01c tam āhuḥ suprajā iti yas te somāvidhan mana indrāyendo pari srava ||  
 9.114.02a ṛṣe mantrakṛtām stomaiḥ kaśyapodvardhayan giraḥ |  
 9.114.02c somaṁ namasya rājānaṁ yo jajñe vīrudhām patir indrāyendo pari srava ||  
 9.114.03a sapta diśo nānāsūryāḥ sapta hotāra ṛtvijaḥ |  
 9.114.03c devā ādityā ye sapta tebhiḥ somābhi rakṣa na indrāyendo pari srava ||  
 9.114.04a yat te rājañ chṛtaṁ havis tena somābhi rakṣa naḥ |  
 9.114.04c arātīvā mā nas tārīn mo ca naḥ kim canāmamad indrāyendo pari srava ||

### Notes by Detlef Eichler

<http://www.detlef108.de/Rigveda.htm>

1. Please note that this text is not for commercial use and released only for personal scholarly activity. This transliteration version of Rigveda is from an ITRANS file which I have created on the basis of The Aufrecht/van Nooten/Holland (Samhita) version of the Rigveda.

2. Font: Times New Roman / Unicode

3. Hiatus ai, au are shown as aī, aū

4. Transliteration:

a ā i ī ī ī u ū ū ṛ ṛ ṛ ṛ e ai o au m ḥ ṁ ' |  
 k kh g gh ṅ c ch j jh ṅ ṭ ṭh ḍ (ḍ) ḍh (ḍh) ṇ t th d dh n p ph b bh m  
 y r l v ś ṣ s h

5. Last updated 30 October 2010